

ՄԱՏԹԵՈՍ Ա.  
ԿՈՍԱԿՆԴՆՈՒՊՈԼՍԵՑԻ

ԱՍՏՈՒԾԱՅԻՆ  
ՇՆՈՐՀՆԵՐԻ  
ԴՈՒՌԸ



Տպագրութիւն ԱՄՆ Արեւմտեան թեմի  
Լոս Անջելէս 2023

ԱՍՏՈՒԱԾԱՅԻՆ ՊԵՍ-ՊԵՍ ՇՆՈՐՀՆԵՐԻ,  
ԲԱՐԻՔՆԵՐԻ ԵՒ ՓԱՌՔԻ  
ԴՈՒՌԸ,  
ԱՄԲԱՐՈՒԱԾ ՍՈՒՐԲ ԳՐՔԻՑ  
ԵՒ  
ՍՐԲԱԶԱՆ ՀԱՅՐԵՐԻ ԳՐՈՒԹԻՒՆՆԵՐԻՑ

ՔՐԻՍՏՈՍԻ ՍՈՒՐԲ ԵԿԵՂԵՑՈՒ  
ԲԱՐԵՄԻՑ ՉԱԲԱԿՆԵՐԻ  
ՀՈԳԵՒՈՐ ԴԱՍՏԻԱՐԱԿՈՒԹԵԱՆ ՀԱՄԱՐ

Գրաբարից աշխարհաբար փոխադրութիւնը եւ  
ծանօթագրութիւնները՝  
Գեւորգ Սրկ. Կարապետեանի  
Խմբագիր՝ Նորայր Պօղոսեան

## Մ Ե Ղ Ր Ա Ծ Ո Ր Ա Ն Գ Ի Ր Ք Ը

«Ոսկեղենիկ» մատենաշարի մտայղացումը կը պատկանէ գիտաշխատող և Առաջնորդարանի պաշտօնեայ գրաբարագէտ պրոֆ. Նորայր Պօղոսեանին:

Ներկայ հատորը մինչև օրս հրապարակուած գրքերու շարքին 7-րդն է, որուն պատրաստութիւնը վստահուած էր բարեշնորհ Գևորգ սրկ. Կարապետեանին, որ յանձնառութիւն առաւ թարգմանել և հրատարակութեան պատրաստել Մատթէոս Կոստանդնուպոլսեցի Կաթողիկոսի «Դուռն Աստուածային պէս-պէս շնորհաց բարեաց և փառաց» գրքոյկը:

Արդարև «Դուռն Աստուածային Շնորհաց» գրքի հեղինակը այնքա՛ն պերճախօսութեամբ և հաւատքի խորաթափանցութեամբ ընթերցողին կը ներկայացնէ էական կարևորութիւնը աստուածային շնորհաց ներգործութեանը մեր հոգևոր կեանքի մէջ: Հեղինակի խօսքերուն մէջ սեղմ երկտող կը ներկայացնէ մեծ հայրապետին տեսիլքը.


«Սուրբ Հոգու բարերարութեան շնորհներով պիտի բացուեն դռները, որոնք գտնուած են վերին կայաններում»:

«Դէպի Աստուած» է եղած հայրապետի հաւատքի նշանաբանը, պատգամ մը, որ այսօր ևս որոշապէս այժմէական է: Սատար ենք բոլորս յագեցնելու համար մեր հոգևոր կեանքը Աւետարանաշունչ պատգամներով: Անհրաժեշտ է կարգալ Հայրապետին գրչէն բխած հոգևոր մարգարիտները, որոնք իրապէս կը լուսաւորեն մեր էութեան հոգևոր տաճարը:

Երախտապարտ ենք պրոֆ. Նորայր Պօղոսեանին իր այս նախաձեռնութեանը առիթով, որ անգամ մ'ևս լոյս կ'ընծայուի՝ հաւատացեալին կեանքն առաջնորդելու համար առ Աստուած: Նոյնքան գնահատանքի արժանի է նաև բարեշնորհ Գևորգ սրկ. Կարապետեանի հմտութիւնը զայն գրաբարէն աշխարհաբարի թարգմանութեան կապակցութեամբ:

Հետևաբար, կը քաջալերենք որ այս հատորը հաւատացեալը դարձնէ մեղրը իր հոգիին ու մտքին, որպէսզի մեր հոգևոր կեանքը դարձնենք նաև քաղցրահամ պատգամներ, որոնց առաջնորդութեամբ մեր կեանքը կը լեցուի Աստուծոյ ներկայութեամբ:

Մնանք ջերմ սիրով  
Աղօթարար՝

Յ. Վահան Արք.

Յովնան Արք. Տէրտէրեան  
24 Նոյեմբեր, 2023

## Ե Ր Կ ՈՒ Խ Օ Ս Ք

19-րդ դարի նշանաւոր հոգեւորական, Ամենայն Հայոց Հայրապետ Մատթէոս Ա. Կոստանդնուպոլսեցին իր ժամանակի ականաւոր գործիչներից էր, հայրենասէր ու եկեղեցանուէր մի անհատականութիւն, որը գիտակցում էր ազգային միասնականութեան եւ հայ ժողովրդի զաւակներին հոգեւոր-բարոյական կրթութեան ճանապարհով դէպի բարօր ապագայ առաջնորդելու կարեւորութիւնը: Կ. Պոլսի Հայոց պատրիարքութեան գահին բազմելու տարիներից Մատթէոս կաթողիկոսը շարունակաբար ազգային-հայրենասիրական ոգի է սերմանել հայ ժողովրդի զաւակների սրտերում:

Մատթէոս Ա. Կոստանդնուպոլսեցին ծնունդ է 1802 թուականին՝ Կ. Պոլսում: 1826 թուականին օծուել է վարդապետ, 1838-ին՝ եպիսկոպոս: 1844 թ. Յուլիսի 1-ին ընտրուել է Կ. Պոլսի Հայոց պատրիարք: 1855 թուականին նշանակուել է Հոգեւոր ժողովի ատենապետ, եղել Արմաշի վանքի վանահայր: 1855 թուականին օծուել է Ամենայն Հայոց կաթողիկոս՝ յաջորդելով Ներսէս Ե. Աշտարակեցուն: Մատթէոս Ա. հայրապետը մեծապէս նպաստել է դպրոցական ուսուցման գործի զարգացմանը, կարգաւորել է Մայր Աթոռի մատենադարանի գործունէութիւնը, մեծ

ջանքեր է ներդրել՝ մեղմելու «Պոլսեանիէ»-ի որոշ յօդուածներ եւ ընդլայնելու Ամենայն Հայոց կաթողիկոսի իրաւասութիւնները: Մահացել է 1865 թուականին՝ Վաղարշապատում եւ ամփոփուած է էջմիածնի Սբ. Գայանէ վանքի գաւթում: Որպէս պատրիարք Մատթէոս եպիսկոպոսն իր առաջին իսկ Պատարագի ժամանակ, երկար ընդհատումից յետոյ Կ. Պոլսում յիշատակել է ժամանակի Ամենայն Հայոց կաթողիկոսի՝ Ներսէս Ե. Աշտարակեցու անունը: Տարիներ անց, երբ իր այս անուանի նախորդի գործը եւ առաքելութիւնը շարունակելու պատիւը բաժին է հասնում իրեն, Մատթէոս Ա. Կոստանդնուպոլսեցին ամենայն պատասխանատուութեամբ յանձն է առնում աստուածընտիր այդ կոչումը:

Որպէս ուսումնասէր եկեղեցական, հմուտ աստուածաբան եւ քարոզիչ՝ հայրապետն աչքի է ընկել իր եկեղեցանուէր ու ազգօգուտ գործունեութեամբ. բացել է հոգեւոր վարժարաններ ու դպրոցներ, նպաստել է արեւմտահայոց Ազգային սահմանադրութեան ընդունմանը, անզիջում պայքար է մղել այլադաւանների նկրտումների դէմ:

Մատթէոս Ա.-ն հեղինակ է կրօնագիտական ու աստուածաբանական մէկ տասնեակից աւելի երկասիրութիւնների, որոնց մէջ լաւագոյնս արտայայտուած են իր ազգային-հայրենասիրական գաղափարները:

Իր ստեղծագործութիւնների մէջ պարզութեամբ եւ միաժամանակ խորութեամբ առանձնանում է «Աստուածային պէս-պէս շնորհների, բարիքների եւ փառքի դուռը» խորագիրը կրող երկը, որում հայրապետը հայ քրիստոնեայի հայեացքն ուղղում է դէպի Աստուած՝ այն ճշմարիտ Դուռը, որտեղից պիտի գայ քրիստոնեայի եւ, հաւաքական առումով, ողջ Հայ ժողովրդի փրկութիւնը:

Վեց գլուխներից բաղկացած այս ստեղծագործութիւնը ընթերցողին ուսուցանում է քրիստոնէական եւ միեւնոյն ժամանակ համամարդկային մի շարք ճշմարտութիւններ:

Առաջին գլխում խօսւում է քրիստոնէական վարդապետութեան Հիմնադիր եւ Վարդապետ Յիսուս Քրիստոսի մասին, Որը քրիստոնեայի համար Կեանքի այն երանաւէտ Դուռն է, որից ներս մտնելով՝ մարդ կարող է բաժնեկից դառնալ աստուածային պէս-պէս շնորհներին ու բարիքներին:

Եւ հենց դա է գրքի վերնագրի մէջ ամփոփուած խորհուրդը՝ դուռ, որ տանում է դէպ Քրիստոս...

Երկրորդ գլխում հայրապետի քննութեան առանցքը հաւատքն է՝ այն անկորնչելի բանալին, որն ամէն մարդու առջեւ բացում է աստուածային եւ երկնահաս շնորհների ու օրհնութիւնների դռները:

Երրորդ գլխում արդէն Մատթէոս կաթողիկոսը քրիստոնեայի հոգում կանգնեցուած հաւատքի կառոյցը խարսխում է աստուածային յոյսի վրայ,

որպէսզի այդ հաւատքն անասան ու անխախտ մնայ: Զէ՞ որ ամէն բան, մինչեւ իսկ մահը ոչինչ է այն քրիստոնեայի համար, որն իր յոյսը Տիրոջ վրայ է դրել:

Չորրորդ գլխում Հայոց հայրապետը խօսում է քրիստոնէական առաքինութիւններից մեծագոյնի՝ սիրոյ մասին: Որեւէ մի զօրութիւն, որեւէ մի ուժ անկարող է դիմագրել սիրոյ առջեւ, քանի որ սէրն աւելի զօրեղ է, քան մահը, եւ աւելի բարձրաթուիչ, քան միւս բոլոր շնորհներն ու առանձնաշնորհումները: Աստուածային սէրն էր, որ Աստծուն երկնքից մինչեւ երկիր խոնարհեցրեց, եւ այդ նոյն սէրն է, որ մարդուն երկրից դէպի երկինք՝ դէպի երկնքի արքայութեան դուռը պիտի հասցնի:

Հինգերորդ գլխում մանրամասնօրէն խօսւում է քրիստոնէութեան ճանապարհի առաջին քայլի՝ Մկրտութեան սուրբ խորհրդի մասին: Մկրտուելու սրբազան պատգամը, որի առաջնակատար գործադրողն Ինքը՝ Աստուածորդին եղաւ, անհրաժարելի պայման է իւրաքանչիւրի համար, ով կամենում է հետեւել Քրիստոսին ու քայլել աստուածացոյց այդ ճանապարհով:

Վերջին՝ վեցերորդ գլխում էլ հայրապետի խորհրդածութեան առարկան Ապաշխարութեան սրբարար խորհուրդն է, որը որպէս բալասան ամոքում է մեր հոգին խոցոտող չարահնար վէրքերն ու մեծածայն դժբախտով մեր առջեւ լայնօրէն բացում է փրկութեան դուռը:




Բոլոր վեց գլուխներում էլ Մատթէոս կաթողիկոսն իր խօսքը համեմու՛մ է Աստուածաշնչեան մէջբերումներով ու Հայոց Եկեղեցու եւ համաքրիստոնէական մեծագոյն սրբերի՝ Գրիգոր Լուսաւորչի, Նարեկացու, Ոսկեբերանի, Կիրեղ Երուսաղեմացու եւ այլոց խրատներով ու հոգեհորոգ պատգամներով:

Հոգեւոր-բարոյական ազդեցիկ ուժ ունեցող այս երկն իսկապէս արժանի տեղ ունի Մատթէոս Ա. հայրապետի մատենագրական ժառանգութեան մէջ եւ ուսուցողական ու խրատական իր ներուժով մեծ նպաստ կարող է բերել քրիստոնեայի հոգեւոր կրթութեան ու զարգացման գործում նաեւ մեր օրերում:

Յանկանում ենք երախտագիտութեան խօսք ասել ԱՄՆ Արեւմտեան թեմի Առաջնորդ Գերշ. Տ. Յովնան Արք. Տէրտէրեանին, որի հովանաւորութեամբ սոյն երկը գրաբարից թարգմանաբար տպագրու՛մ է որպէս «Ոսկեղենիկ» մատենաշարի 7-րդ հատոր՝ ի վայելք ընթերցասէր եւ հաւատաւոր մեր քոյրերի եւ եղբայրների:

Գեւորգ Սրկ. Կարապետեան



«Դուռն Աստուածային Շնորհաց» 1865 թ.  
հրատարակութեան տիտղոսաթերթը:

## Ա Ռ Ա Ջ Ա Բ Ա Ն

Նախ պետք է գիտենալ, որ անթիւ ու բազմատեսակ են աստուածային ամենափափագելի շնորհներն ու բարիքները, որոնք մարդասեր Տէրն Իր ինսամառատ գթութեամբ պարգեւում է Իր սիրելիների հոգիներին:

Աստուած մշտապէս կամենում է, որ ամենքը ժառանգեն այդ պարգեւները՝ ուղղափառ հաւատով, սուրբ սրտով ու զարդարուն հոգով առաքիլութեան պտղաբեր գործեր կատարելու միջոցով: Դրա համար է, որ սրբազան Պօղոս առաքեալը գրում է. «Աստծոյ ինձ տուած շնորհով այս եմ ասում ձեզնից իւրաքանչիւրին. դուք ձեզ ակելի մի՛ գնահատէք, քան ինչ որ է ձեր արժանիքը. այլ իւրաքանչիւրդ ձեր մասին խորհեցէ՛ք զգաստութեամբ, այն հաւատի չափով, որ Աստուած բաժանեց: Ինչպէս մի մարմնի մէջ բազում անդամներ ունենք, եւ բոլոր անդամները նոյն գործը չեն անում, այդպէս եւ մենք, թուով շատ, մի մարմին ենք Քրիստոսով, բայց իւրաքանչիւրս միմեանց անդամ ենք: Բայց մենք ունենք տեսակ-

տեսակ պարգեւներ, ըստ այն շնորհների, որ տրուած են մեզ» (Հռոմ. 12:3-6):

Տեսա՞ր աստուածային տեսակ-տեսակ շնորհների ու պէս-պէս բարիքների առատաձիր պարգեւները, որոնք որպէս ժառանգութիւն պատրաստուած են արժանաւորների համար: Ողջ սրտով ունկնդրի՛ր նաեւ սրբազան Պետրոս առաքեալի խրատական խօսքերը. «Իւրաքանչիւր ոք ինչպիսի շնորհ որ ընդունել է, ուրիշի հանդէպ թող նոյնը մատակարարի որպէս բարի տնտես Աստծոյ պէսպէս շնորհների: Եթէ մէկը խօսի, թող այդ լինի Աստծոյ պատգամների նման: Եթէ մէկը մատակարարի, թող այդ լինի այն զօրութիւնից, որն Աստուած շնորհում է» (Ա Պետ. 4:10-11):

Արդ, աստուածային ամենացանկալի, արդարացնող շնորհների եւ երկնաձիր պարգեւների ու փառքի տեսակները պէս-պէս ու բազմապատիկ են, եւ այդ շնորհներից ու փառքից իւրաքանչիւրն ունի սքանչելի եւ պէս-պէս դռներ, որոնք բացուում են արդարների առաջ: Այդ դռները մարգարեական հոգով տեսաւ երջանիկ Դաւիթը՝ փափագելով ու խնդրելով հետեւեալը. «Բացէ՛ք արդարութեան դռներն իմ առաջ, որ մտնեմ ներս ու Տիրոջը գոհութիւն մատուցեմ»(Սաղմ. 117:19):

Տեսնո՞ւմ ես, մարգարեն հոգևակի է գրում «արքայութեան դռները», եւ ոչ թէ եզակի, քանի որ, ըստ աստուածային զարմանազան շնորհների, աստուածային արդարութեան զանազան դռներ էր տեսնում, ինչի մասին սուրբ Յովհան Ոսկեբերանը գրում է. «Մարգարեական տեսութեան առջեւ յայտնուել էին աստուածային շնորհների ու զանազան բարերարութիւնների տեսակ-տեսակ դռները, դրա համար էլ նա սկսեց սրտափափագ երգել այսպէս. «Բացէ՛ք արդարութեան դռներն իմ առաջ» (Սբ. Յովհան Ոսկեբերան, ճառ ԻԶ):

Այդպէս նաեւ մեր Նախահայրապետ եւ Լուսաւորիչ սուրբ Գրիգորը մեզ քարոզեց, որ Աստծոյ տեսակ-տեսակ շնորհների համար երկնքի արքայութեան մէջ բազմատեսակ դռներ կան: Դարձեալ հոգևակի թիւ կիրառելով՝ Լուսաւորիչն ասում է. «Իսկ երբ ծագեց մեր Տէր Յիսուս Քրիստոս՝ Արդարութեան Արեգակը եւ աշխարհի Փրկիչը, առաջնահերթ կատարեալ դարձրեց ու իր լրումին հասցրեց այս մի պակասութիւնը՝ բացելով նոր շնորհների կենսաբեր դռները՝ Աւազանի լուսաւորութեան միջոցով Ամենասուրբ Երրորդութեան հանդէպ ուղղափառ հաւատք հաստատելով... Եւ ովքեր Քրիստոսի սուրբ սիրոյ վրայ են հաստատուած՝ պատրաստ լինելով իրենց անձերը մահուան մատնել նրա

համար, պիտի ազատուեն երեւելի եւ աներեւոյթ դառնագին վշտերից ու պիտի փրկուեն՝ գործակից եւ բարեխօս ունենալով սուրբերին եւ բոլոր արդարներիս: Եւ Սուրբ Հոգու բարերարութեան շնորհներով պիտի բացուեն կեանքի դռները, որոնք գտնուում են վերին կայաններում, որտեղ հանգչում են սուրբերի դասերը: Քանի որ Աստուած կամենում է, որ ամենքը գիտակցաբար ճշմարիտ կեանքի ժառանգորդը դառնան, որովհետեւ Տէրը չի ցանկանում մեղաւորի մահը, այլ դարձը դէպի Քրիստոս» *(Յաճախապատում, ճառ ԺԳ):*

Ուրեմն թող որ մեր Փրկիչ Յիսուս Քրիստոսի փրկարար տնօրինութեամբ մենք խոյնալու արժանանանք Երկնքի արքայութեան ամենացանկալի, երանաւետ դռները ժառանգելուն եւ սուրբերի երջանիկ դասերի հետ յաւիտեան փառաբանելուն Ամենասուրբ Երրորդութեանը, Որի անարժան ծառան և համայն Ազգիս համար մշտահայց աղօթարարն եմ ես:

*Մատթէոս Կաթողիկոս Ամենայն Հայոց*

Գլուխ Ա.  
ՔՐԻՍՏՈՍ՝ ԴՈՒՈՇ ԱՐՔԱՅՈՒԹԵԱԼ

Արդ, յաւիտեանական կեանքի երանութեան ամենացանկալի Դուռն Ինքը՝ Քրիստոս է. «Ես եմ Դուռը. եթէ մէկն Իմ միջով անցնելով ներս մտնի, կը փրկուի. կը մտնի ու կ'ելնի եւ ճարակելու բան կը գտնի» (Յովհ. 10:9): Այս խօսքի վերաբերեալ սուրբ Յակոբ Մծբնեցի հայրապետը գրում է. «Երկնքի Դուռն Ինքը՝ Քրիստոս է, ինչպէս որ Նա ասաց՝ «Ես եմ Կեանքի Դուռը, եւ ամէն ոք, ով Իմ միջով անցնելով ներս է մտնում, յաւիտեան կ'ապրի»: Եւ Դաւիթն էլ 117:20-րդ Սաղմոսում ասաց. «Տիրոջ Դուռն է սա, եւ արդարները այս Դռնով պիտի մտնեն» (Սբ. Յակոբ Մծբնեցի, «Գիրք որ կոչի Չգօն», ճառ Դ):

Քրիստոս արդարութեան Դուռն է, սակայն Նա Իր շնորհները փակ է պահում անհաւատների առաջ, եւ մեր ուղղափառ ու սուրբ հաւատն է, որ առաքինազարդ լոյսով բացում է այդ Դուռը, որի վերաբերեալ առաքեալն ասում է. «Ո՛չ թէ նրա համար, որ ունենամ իմ արդարութիւնը, որ Օրէնքից է, այլ

Քրիստոսի հաւատից եղած արդարութիւնը, որ Աստուծոց եկող արդարութիւնն է՝ հաւատով» (Փլպ. 3:9):

Սուրբ Ներսէս Լամբրոնացին ասում է, որ ամեն-քը չէ, որ կարող են գիտութեամբ հասնել այդ հաւատքին, այլ միայն նրա՛նք, ովքեր կրթուած են փորձառութեամբ: Քրիստոսի շնորհներն ու մահը, որով ամենքն արդարացան, Կեանքի Դուռն է, եւ արդարացածները հաւատով արժանանում են երկ-նային խոստումների հանդէպ յոյսի իրականաց-մանը: Ինչպէս որ Քրիստոս էլ ասում էր. «Ես եմ Դուռը. եթէ մէկն իմ միջով անցնելով ներս մտնի, կը փրկուի» (Սբ. Ներսէս Լամբրոնացի, «Մեկնութիւն Սաղմոսաց»):

Իսկ սուրբ Գրիգոր Նարեկացի հրեշտակակրօն Վարդապետն էլ այսպէս է բնորոշում այս Դուռը.

Խոստովանուած անուն, պաշտելի պատկեր,  
անպարագիր տիպ,  
Երկրպագուած տէրութիւն, բարեբանուած  
յիշատակ,  
Խնդութեան մուտք, անվրէպ շաւիղ, փառքի  
դուռ:

(Սբ. Գրիգոր Նարեկացի, «Մատեան ողբեր-  
գութեան», Բան ԼԲ)



Շարակնոցում ենք տեսնում այս մասին գրուած տողեր. «Կեանքի Դուռ, Յիսո՛ւս, մեզ նոյնպէս ներս մտցրու այնտեղ, ուր Քո Հայրը եւ Հոգին են, որպէսզի մշտապէս փառաբանութիւն օրհներգենք» (*Շարակնոց*):

Իսկապէս որ երանելի են նրանք, ովքեր ուղղափառ, ճշմարիտ հաւատով եւ աստուածահաճոյ, առաքիւնի գործերով զարդարուած՝ մերձենում ու հաղորդակից են դառնում յաւիտենական կեանքին՝ ներս մտնելով երկնային դռներով եւ ժառանգելով երկնքի արքայութեան յաւերժական կեանքը:

Տե՛ս, իմաստուն կոյսերը մեզ օրինակ են տալիս երկնայարկ<sup>1</sup> դռները բացելու համար: Իսկապէս որ, նրանք Աստոյ առջեւ իմաստուն էին, քանի որ ոչ միայն հաւատք ունէին, այլ նաեւ բոցավառուած էին առաքիւնի գործերով: Դրա շնորհիւ նրանց լապտերները չմարեցին, այլ անշեջ մնացին, իսկ նրանք էլ մուտք գործեցին յաւիտենական կեանքի դռնով ու վայելեցին վերին հարսնարանի<sup>2</sup> յաւիտենական ու-

---

<sup>1</sup> Երկնահաս, երկնքի սեմին գտնուող: Խօսքը Երկնքի օթեւանների՝ Արքայութեան դռների մասին է:

<sup>2</sup> Դեռեւս Հին Կտակարանում Աստուած և Նրա սեփական ժողովուրդը (ինում՝ հրեաները, Քրիստոսի մարդեղութեամբ՝ Փրկչին ապաւինող բոլոր հաւատացեալներս) միմեանց

րախուրթիւնը: Այս մասին Յակոբոս առաքեալը գրում է. «Ինչպէս որ մեռած է մարմինը առանց հոգու, այնպէս էլ մեռած է հաւատը առանց գործերի» (Յակ. 2:26):

Իսկ ահա միւս հինգ կոյտերն, արդարեւ, յիմարացած էին, քանի որ իրենց հաւատքի լապտերներում բաւականաչափ աստուածահաճոյ իւր, այն է՝ առաքիւնի գործեր չունէին, այդ իսկ պատճառով էլ նրանք չարժանացան միեւնոյն հարսնարանի փառքին:

Ուրեմն թող այնպէս չլինի, որ մենք Աստծոյ առջեւ որպէս յիմարներ ներկայանանք՝ միայն Աւետարանական ճշմարտութեան հանդէպ հաւատ

---

կապուած էին Ուխտի միջոցով, որ յաճախ նմանեցվում էր ամուսնական դաշինքին («Ես պիտի հրճուեմ Տիրոջով, որովհետեւ Նա ինձ փրկութեան զգեստ եւ ուրախութեան պատմուճան հագցրեց, որպէս փեսայի՝ պսակ դրեց իմ գլխին եւ որպէս հարսի՝ զուգեց ինձ զարդով» (Եսայի 61 10, և այլն): Աստուած երկնաւոր Փեսան է, իսկ ժողովուրդը, այն է՝ Քրիստոսի Եկեղեցին, հարսն է, եւ այս երկուսի խորհրդաւոր միութիւնը հարսանեկան այն բերկրալի ուրախութիւնն է, որին քրիստոնէաներիս մասնակից դարձրեց Յիսուս Քրիստոս Իր փրկարար մարդեղութեան, երկրային տնօրինութեան եւ Յարութեան շնորհիւ: Այս համատեքստում «հարսնարանը» Երկնքի արքայութիւնն է, ուր յաւիտենական ուրախութիւն եւ ցնծութիւն է տիրում Քրիստոս-Փեսային հարսնացած սուրբերի բազմութեան համար:

ունենալով, այլ այդ հաւատը հաստատենք աստուածահաճոյ, առաքինի գործերով: Դրա շնորհիւ է, որ պիտի իմաստութեան երանաւետ գովասանքին արժանանանք Յիսուսի՝ մեր Փրկչի աստուածային շուրթերից, այլ ոչ թէ յիմարութեան «վա՛յ»-ը սպառնայ մեզ: Դա յայտնի օրինակով հրամայեց Նոյն Ինքը՝ Քրիստոս, այսպէս ասելով. «Ով որ լսում է Իմ այս խօսքերը եւ կատարում է դրանք, կը նմանուի մի իմաստուն մարդու, որ իր տունը շինեց ժայռի վրայ. անձրեւները թափուեցին, եւ գետերը յորդեցին, հողմերը փչեցին եւ զարկեցին այդ տանը, բայց չկործանուեց, որովհետեւ ժայռի վրայ էր հաստատուած: Իսկ ով որ լսում է Իմ այս խօսքերը եւ դրանք չի կատարում, կը նմանուի մի յիմար մարդու, որ իր տունը շինեց ավազի վրայ. անձրեւները թափուեցին, գետերը բարձրացան, հողմերը փչեցին եւ զարկեցին տանը, եւ նա ընկաւ. եւ նրա կործանումը շատ մեծ եղաւ» (*Մատթ. 7:24-27*):

Ահաւասիկ, աստուածային օրէնքներից ու պատուիրաններից ունայն եւ թափուր մնացած յիմարների համար է, որ սուրբերի երանելի դասերը սուգ են անում եւ տրտմում են, ինչպէս որ անում էր Դաւիթ մարգարէն. «Տրտմութիւն իջաւ ինձ վրայ մեղաւորների ու քո օրէնքը լքողների երեսից» (*Սաղմ. 118:53*): Այդպէս նաեւ սրբազան Պօղոս

առաքելան է գրում. «Ճշմարիտն եմ ասում Քրիստոսով եւ չեմ ստում, – խղճմտանքս է ինձ վկայում Սուրբ Հոգով, որ մեծ տրտմութիւն է ինձ եւ անհատնում ցաւ՝ իմ սրտին» (Հռոմ. 9:1-2):

Ըստ այսմ, մենք նոյնպէս մեր խղճմտանքի համաձայն ունկնդիր լինենք մեր Նախակարապետ եւ Լուսաւորիչ սուրբ Գրիգորի խրատական խօսքերի քարոզութեանը, որով նա գրում է. «Իմաստութիւնը քարոզում ենք հոգեպէս կատարելներին, որոնք կարողանում են զանազանել մշտնջենաւորը՝ անցաւորից: Իմաստութի՛ւն, որ այս աշխարհի՝ կործանման սահմանուած իշխանների իմաստութիւնը չէ, այլ ա՛յն, որն Աստծոյ արդարութիւնն է՝ ճշմարիտ հաւատքով եւ սուրբ սիրով (Ա Կորնթ. 2:6):

Սրբութիւն եւ խոնարհութիւն, հեզութիւն եւ ճշմարտութիւն է, բոլոր առաքիւնութիւններով զօրացած եւ Աստծոյ երկիւղն ունենալով՝ զգուշանալ ամենապատիր<sup>3</sup> խաբկանքներից ու ընտրողական իմաստութեամբ զատորոշել բարի խորհրդածուները, խօսքերը եւ գործերը: Քանի որ Կեանքի իմաստութեան դուռը բաց է, սակայն բազմաթիւ են բանսարկուին գործակից հակառակորդները, որոնք մարդկանց որդիներին որսում են կորստեան

---

<sup>3</sup> Ամենքին պատրող, խաբող:

մատնելու համար: Սակայն Աստուած չի թողնում  
Իրեն յուսացողներին, որոնք ցերեկ ու գիշեր Նրան են  
դիմում (*Ղուկ. 18:7*) եւ խնդրում են ողորմութիւն ու  
յաղթութիւն՝ ընդդէմ դեւերի բոլոր վնասակա-  
րութիւնների, որպէսզի Աստուած փառաւորուի այժմ  
եւ միշտ եւ յաւիտեանս յաւիտենից. ամէն»  
(*Յաճախապատում, ճառ ԻԱ*):

Գլուխ Բ.  
ՀԱԲԱՏՔԻ ՄԱՍԻՆ

Այո՛, խոստովանում ենք, որ ուղղափառ հա-  
ւատի ճշմարտութիւնը եւ անտարանական ան-  
սխալ վարդապետութիւնը յաւիտենական փառքի ու  
անմահ կենդանութեան երանաւետ դուռն է, եւ այս  
ամենացանկալի դռան Հիմնադիրն ու Հաստատողը  
մեր Տէր Յիսուս Քրիստոս Ինքն է: Այս ճշմար-  
տութեան մասին է վկայում Սուրբ Գիրքը. «Քարն  
այն, որ շինարարներն արհամարհեցին, ա՛յն դար-  
ձաւ անկիւնաքար: Տիրոջից եղաւ այս բանը, եւ  
սքանչելի է մեր աչքերին» (Սաղմ. 117:22-23): Նաեւ՝  
«Ահա ես Սիոնի հիմքում մեծագին քար եմ դնում,  
պատուական ու ազնիւ անկիւնաքար՝ նրա հիմքում,  
եւ ով որ հաւատայ նրան՝ չի ամաչի» (Ես. 28:16):  
Դարձեալ՝ «Սա՛ է այն վեմը, ձեզնից՝ շինողներիցդ  
անարգուած, որ անկիւնաքար եղաւ: Եւ ուրիշ մէկի  
միջոցով փրկութիւն չկայ, որովհետեւ երկնքի տակ  
չկայ մարդկանց տրուած այլ անուն, որով կարելի  
լինի, որ մենք փրկուենք» (Գործք 4:11-12): Ինչպէս եւ՝  
«Ահաւասիկ դնում եմ Սիոնի մեջ քար գայթա-

կղուբեան եւ վեմ գլորման. եւ ամենայն ոք, որ հաւատայ նրան, չի ամաչելու» (Հռոմ. 9:33):

Ահաւասիկ, քրիստոնէական ճշմարիտ հաւատի այս ամենահաստատ դուռը սիրելի է աստուածային բարեխնամ կամքի համար, ինչի մասին որ գրում է երջանիկ մարգարէ Դաւիթը. «Նրա հիմքերն իր սուրբ լերան վրայ են. Տէրը սիրում է Սիոնի դարպասներն աւելի, քան Յակոբի բոլոր վրանները» (Սաղմ. 86:2):

Եւ ահա, քրիստոնէական ճշմարիտ հաւատքի այս դուռը աստուածային մարդասէր շնորհներով բացւում է նրա՛նց առաջ, ովքեր խղճմտանքով եւ ջերմեռանդութեամբ հետեւում են աւետարանական ճշմարիտ վարդապետութեանն ու առաքելական հոգեբուխ քարոզութեանը. «Եւ երբ եկան ու հաւաքուեցին եկեղեցում, պատմեցին, թէ Աստուած նրանց հետ ինչքան բաներ արեց եւ թէ ինչպէս հեթանոսների առաջ հաւատի դուռը բացեց» (Գործք 14:26): Նաեւ՝ «Միաժամանակ աղօթեցէք եւ մե՛զ համար, որպէսզի Աստուած բացի մեր առաջ խօսքի դուռը՝ յայտնելու խորհուրդը Քրիստոսի» (Կորն. 4:3):

Երբ ջերմեռանդ սիրով ունկնդիր ենք լինում սրբազան գրքերին եւ սուրբ հայրերի հոգեբուխ խօսքերին, արդարեւ, առաջնորդւում եւ գտնում ենք քրիստոնէական ուղղափառ հաւատի դուռը: Իսրա-

յելական ըմբոստ ու ապերախտ ազգին սաստելով՝ մեր Փրկիչ Յիսուս Քրիստոս այս օրինակն է աւանդում մեզ. «Բայց ես աւելի մեծ վկայութիւն ունեմ, քան Յովհաննէսինը. այն գործերը, որ Հայրն Ինձ տուեց, որ կատարեմ, այդ նոյն գործերն իսկ, որ անում եմ, վկայում են Իմ մասին, թէ Հայրն է ուղարկել Ինձ: Եւ Հայրը, որ Ինձ ուղարկեց, նա՛ է վկայել Իմ մասին. դուք ո՛չ Նրա ձայնն էք երբեւէ լսել եւ ո՛չ էլ Նրա երեսն էք տեսել: Եւ ո՛չ էլ Նրա խօսքն ունեք ձեր մէջ բնակուած, որովհետեւ, ում նա ուղարկեց, դուք Նրան չէք հաւատում: Քննեցէ՛ք Գրքերը, քանի որ կարծում էք, թէ նրանցով յաւիտենական կեանք կ’ունենաք: Բայց այդ Գրքերն իսկ վկայում են Իմ մասին, որովհետեւ դուք կարծում էք, թէ յաւիտենական կեանք ունեք: Եւ դուք չէք կամենում դէպի Ինձ գալ, որպէսզի կեանք ունենաք: Ես մարդկանցից փառք չեմ առնում: Բայց գիտեմ ձեզ, որ Աստծոյ հանդէպ սեր չունեք ձեր մէջ: Ես եկայ Իմ Հօր անունով, եւ Ինձ չէք ընդունում: Եթէ ուրիշ մէկը գայ Իր անունով, նրան կ’ընդունեք: Դուք ինչպե՞ս կարող էք հաւատալ, քանի որ իրարից էք փառք առնում եւ չէք որոնում այն փառքը, որ միակ Աստծուց է գալիս» (Հովհ. 5:36-44):

Տեսէ՛ք նաեւ այն օրինակը, որը գրի է առնուած Գործք Առաքելոցում: Եթովպացի երանելի այրը,



ընթերցելով Եսայու մարգարեութիւնը, հետաքրքրուեց այնտեղ գրուած խօսքերով, որի համար եւ Աստուծոյ կողմից առաքուեց երանելի Փիլիպպոս առաքյալը, ում առաջնորդութեամբ այդ եթովպացուն հաջողուեց գտնել քրիստոնէական հաւատի դուռը. «Տիրոջ հրեշտակը Փիլիպպոսին ասաց. «Վե՛ր կաց եւ գնա՛ դու հարաւի կողմը՝ այն ճանապարհով, որ իջնում է Երուսաղէմից Գազա, որ անապատ է»։ Նա վեր կացաւ ու գնաց։ Եւ ահա եթովպացի մի ներքինի, եթովպացիների Կանդակա թագուհու պաշտօնեաներից մէկը, որ նրա բոլոր գանձերի վերակացուն էր ու Երուսաղէմ երկրպագելու էր եկել, վերադառնալիս, իր կառքի մէջ նստած, Եսայի մարգարէ էր ընթերցում։ Սուրբ Յոզիմ Փիլիպպոսին ասաց. «Առաջացի՛ր եւ այդ կառքի մօտ գնա»։ Եւ Փիլիպպոսը առաջ վազելով՝ լսեց, որ նա Եսայի մարգարէ էր ընթերցում. ու ասաց. «Հասկանո՞ւմ ես արդեօք, ինչ որ ընթերցում ես»։ Իսկ նա ասաց. «Ինչպե՞ս կը կարողանամ հասկանալ, եթէ մէկն ինձ չառաջնորդի»։ Եւ ինդրեց Փիլիպպոսին, որ բարձրանայ ու իր մօտ նստի։ Եւ նրա ընթերցած գրքի հատուածն այս էր. «Մորթուելու տարուեց նա ինչպէս մի ոչխար. եւ ինչպէս անմռունչ գառն իր բուրդը խուզողի առաջ, այնպէս էլ նա իր բերանը չի բացում. իր խոնարհութեան պատճառով նրա

դատաստանը տեղի չունեցաւ. եւ նրա ազգատոհմի մասին ո՞վ պիտի պատմի. քանի որ նրա կեանքը երկրից վերացուած է»: Ներքինին հարցրեց Փիլիպպոսին. «Խնդրում եմ քեզ, մարգարէն ո՞ւմ մասին է ասում այս. ի՞ր մասին, թե՞ մէկ ուրիշի»: Փիլիպպոսը բացեց իր բերանը եւ այդ գրքից սկսելով՝ Յիսուսին ակետարանեց նրան: Երբ իրենց ճանապարհն էին գնում, հասան մի ջրի մօտ: Եւ ներքինին ասաց. «Ահա՛ ջուր, ի՞նչն է ինձ արգելում մկրտուել»: Եւ նա ասաց նրան. «Եթէ քո ամբողջ սրտով հաւատում ես, կարելի է»: Նա պատասխան տուեց ու ասաց. «Հաւատում եմ, որ Յիսուս Քրիստոս Աստծոյ Որդին է»: Եւ ներքինին հրամայեց կառքը կանգնեցնել. երկուսով ջուրն իջան. ե՛ւ Փիլիպպոսը, ե՛ւ ներքինին: Եւ Փիլիպպոսը մկրտեց նրան: Երբ ջրից դուրս ելան, Սուրբ Հոգին իջաւ ներքինու վրայ. եւ Տիրոջ հրեշտակը յափշտակեց տարաւ Փիլիպպոսին, ու ներքինին այլեւս նրան չտեսաւ: Եւ իր ճանապարհն էր գնում ուրախութեամբ» (Գործք 8:26-39):

Եթէ կամենում ենք նմանուել Քրիստոսին եւ մաս ունենալ նրա փառքից, ապա մեր կեանքի ընթացքում չպիտի ծովանանք, այլ մեր միտքը սեւեռենք նպատակակետին՝ անվեհեր ջանասիրութեամբ ուսուցանելու եւ գործադրելու համար նրա կամքը: Միայն այդժամ մենք «մեծ» կը կոչուենք

Աստծոյ արքայութեան մէջ՝ ապրելով ըստ այն վարդապետութեան, համաձայն որի Յիսուս իր տնօրինութեան ժամանակ ինքը գործեց եւ նոյնն ուսուցանեց իր ընտրեալներին: Ուստի մեր Փրկչի անցած ճանապարհին նայելով՝ նմանուող լինենք Նրան, եւ մարգարեութեամբ, հայրապետութեամբ ու առաքելական քարոզութեամբ ճանաչենք ամենակալ Զօրը, համազօր Որդուն եւ համագործակից Զոգուն: Եւ թող որ ամենքն էլ ճանաչեն, գիտենան ու սովորեն գործել Արարչի կամքի համաձայն՝ Նրա սիրուց անբաժանելի մտալով թէ՛ նեղութեան եւ թէ՛ անդորրութեան ժամանակ՝ որպէս այդ ամէնի երախտիք Բարերարի կամքով արդարացուած գտնուելով: Ուստի մեր «ճգնութիւնների վաստակը վկայենք Աստծուն եւ մտերմութեամբ օրհնենք Տիրոջը՝ բոլոր բարիքները տուողին, ու գոհանալով փառաւորենք Նրան» (Յաճախապատում, Եւոք Բ):

Սուրբ Ներսէս Շնորհալին, հաւատի մասին խօսելով, ասում է. «Հաւատն ունի մէկ անուն, բայց այդ անունը երկու զօրութիւն է բովանդակում: Հաւատի մի տեսակը դաւանաբանական է, որը Սուրբ Երրորդութեան խոստովանութիւնն է: Այս տեսակը իւրաքանչիւր ոք ընդունում է Աւագանից<sup>4</sup>: Հաւատի

---

<sup>4</sup> Սուրբ Մկրտութեան միջոցով:

երկրորդ տեսակը հետեւեալն է. այն խօսքերը, որոնք Սուրբ Յոզիս խօսել է մարգարէների, առաքեալների եւ եկեղեցու վարդապետների շուրթերով, որոնք էլ իրենց հերթին այդ խօսքերը գրել են սրբազան գրութիւններում, հաւատացեալն առասպել ու ստաբանութիւն չպիտի համարի, այլ պիտի հաւատայ, որ դրանք ճշմարիտ եւ ուղղամիտ են, ու այնպէ՛ս հաւատայ, որպէս թէ իր սեփական աչքերով է տեսնում այն ամէնը, ինչ եղել է, ինչ պիտի լինի եւ ինչը որ կայ: Եղածն այն է, ինչը որ պատմում են, թէ՛ տեսանելի եւ անտեսանելի ողջ բնութիւնն ի սկզբանէ գոյութիւն չունէր, այլ միայն Աստծոյ հրամանով ստեղծուեց, եւ արարածների ստեղծումից յետոյ ամէն բան սքանչելի էր: Աստծոյ կողմից կատարուած այդ զօրաւոր գործերի մասին պատմում է Սուրբ Գրքում՝ Յին եւ Նոր Կտակարաններում:

Իսկ ահա այն, ինչը որ ասում են, թէ պիտի լինի, հետեւեալն է. բարեգործներին՝ բարի փոխհատուցում Աստծոյ կողմից, իսկ չարագործներին՝ տանջանք եւ յաւիտենական հուր:

Եւ այն, ինչը որ կայ, հետեւեալն է, որ իրենց բոլոր խօսքերում քարոզեն, թէ Աստուած ամենքին մօտ է եւ ոչ թէ հեռու, ու գիտի, թէ մարդիկ ինչ են խորհում իրենց մտքում՝ լինի դա բարի, թէ չար: Եւ ինչ որ խօսում են լեզուով, Նա անսխալաբար լսում է,

Եւ յայտնապէս տեսնում է այն, ինչ ծածուկ գործում են մարմնով (*Սբ. Ներսէս Շնորհալի, «Թուղթ ընդհանրական»*):

Ուստի, սիրելիներ՛ր, այսուհետեւ մերձենալք հաւատքին, քանի որ այսօրինակ բազմաթիւ զօրութիւններ կան նրա մէջ: Հաւատքը ոմանց մինչեւ երկինք բարձրացրեց, ոմանք հաւատքով յաղթեցին ջրհեղեղներին: Հաւատքը ամուլներին բազմածին դարձրեց, փրկեց սրի հարուածներից, արձակեց կապուածներին, դուրս բերեց գբից եւ հարստացրեց աղքատին: Դարձեալ, հաւատքը փրկեց հալածեալներին, երկնքից հուր իջեցրեց, բաժանեց ծովը, պատռեց վեմը եւ ծարաւեալներին արբեցրեց ջրով, կերակրեց քաղցածներին, ապրեցրեց մեռեալներին ու փրկեց դժոխքից:

Հաւատքը խաղաղեցրեց փոթորիկները, բժշկեց հիւանդներին ու յաղթեց զօրութիւններին, կործանեց պարիսպները եւ փակեց առիւծների բերանները, շիջանեց հուրն ու խոնարհեցրեց ամբարտաւաններին, իսկ խոնարհներին հասցրեց մեծապատիւ փառքի, եւ այդ բոլոր զօրութիւնները հաւատքի միջոցով գործուեցին (*Սբ. Յակոբ Մծբնեցի, «Գիրք որ կոչի Չգօն», Ճառ Ա*):

Այս մասին են վկայում նաեւ սուրբ Գրիգոր Նարեկացու խօսքերը.

Քանզի արդարեւ յստակ տեսողութիւնը,  
կատարեալ իմաստութիւնը,  
Մտերմութիւնն Աստծոյ հետ եւ Բարձրեալին  
ծանօթ լինելը  
Հաւատքի մասն են - մի երջանիկ եւ ընտրեա՛լ  
բառ,  
Որ յարատեւելով մնում է անվթար եւ  
անպարփակ՝  
Պատուակից լինելով յոյսին եւ սիրոյն:  
Քանի որ մանանեխի ամենափոքրիկ հատիկի  
չափով հաւատքը եթէ  
Զօրեղապէս կարող է ծովի խորքը փոխադրել  
մեծամեծ լեռներ,  
Ապա ճիշտ է, որ կեանքի առաջնորդն այս  
Նախաշաւիղ՝  
Հաւատն ընդունեցինք որպէս աներկմիտ  
աստուածապաշտութիւն:  
Սիրոյ եւ յոյսի դասակից եւ Երրորդութեան  
փառատրելի անուամբ պատուում  
Այդ հաւատքն է, որ հոգու աչքերով  
աներկբայօրէն  
Տեսնում է ծածուկները բոլոր եւ ապագան:  
Քանզի այս երեք առանձին մասերը եթէ  
միասին եւ նոյն խորհուրդով դիտես,

Նրանց շնորհիւ Աստծով պիտի յաւէտ

ճոխանաս:

Քանզի եթէ հաւատաս Նրան, որ հաւատարիմ

է, կը սիրես նաեւ,

Որով եւ կը յուսաս Նրա աներեւոյթ

պարգեւներին:

Նրան փա՛ռք յաւիտեանս. Ամէն:

*(Սբ. Գրիգոր Նարեկացի, «Մատեան  
ողբերգութեան», Բան LP)*

Գլուխ Գ.  
ՅՈՅՍԻ ՄԱՍԻՆ

Այսպիսով, ամենքս էլ ցանկանում ենք աստուածահաճոյ եւ երանաւետ յոյսի տեսութիւնը վայելել: Արդ, պետք է գիտենալ, թէ ի՞նչ է յոյսը: Աստծոյ հանդէպ հաստատուն յոյսը քրիստոնէական ուղղափառ, ճշմարիտ հաւատքի սքանչելի ծնունդն է, որի մասին գրում է սրբազան Պետրոս առաքեալը. «Օրհնեա՛լ է Աստուած եւ Հայրը մեր Տէր Յիսուս Քրիստոսի, որ իր առատ ողորմութեամբ մեզ վերստին ծնեց կենդանի յոյսի համար՝ մեռելներից Յիսուս Քրիստոսի յարութեամբ. ծնեց անեղծ եւ անարատ ու անթառամ ժառանգութեան համար, որ պահուած է երկնքում ձեզ համար, ձե՛զ, որ Աստծոյ զօրութեամբ պահուած էիք հաւատով՝ փրկութեան համար, որ պատրաստ է յայտնուելու վերջին ժամանակներում» (Ա Պետ. 1:3-5):

Սուրբ Ոսկեբերանը, յոյսի առաքինութեան մասին խօսելով, ասում է. «Խիստ թշուառ են այն անհաւատները, որոնց յոյսը հաստատուած չէ ամենակարող Աստծոյ վրայ, քանի որ աներկբայ յոյսի



մայրը ճշմարիտ հաւատքն է» (Սբ. Յովհան Ոսկե-  
բերան, Յորդորական ճառ, ԺԴ):

Ուրեմն, յոյսի փառաւոր դուռը ճշմարիտ  
հաւատքն է, «որի միջոցով էլ կարողացանք հաւա-  
տով, մերձենալ այն շնորհին, որի մէջ եւ կանք ու  
պարծենում ենք Աստծոյ փառքի յոյսով» (Հռոմ. 5:2):

Հետեւաբար մենք պարտաւոր ենք մեր աներկ-  
բայ յոյսը խարսխել ամենակալ Աստծոյ եւ Նրա  
ամենակարող Տէրութեան հանդէպ ճշմարիտ, քրիս-  
տոնեական հաւատքին: Ահա այս անհրաժեշտ պար-  
տաւորութիւնն է մեր մտքում արթնացնում սրբա-  
զան Պետրոս առաքեալը, երբ ասում է. «Թող ձեր  
հաւատը եւ յոյսը լինեն Աստծոյ վրայ: Արդ, մաքրեցէ՛ք  
ձեր անձերը հնազանդութեամբ» (Ա Պետ. 1:21-22):

Դրա համար էր, որ երջանիկ Դաւիթ մարգարէն  
երանի էր տալիս Տիրոջը բոլոր ապաւինողներին՝  
ասելով. «Երանի՛ բոլոր Նրանց, ովքեր յոյսը դրել են  
Տիրոջ վրայ» (Սաղմ. 2:14):

Սաղմոսերգուն կամենում է ասել՝ երանի Նրանց,  
ովքեր իրենց անցաւոր կեանքում ճանաչեցին Աստ-  
ծուն որպէս ամենակալ Տէր եւ ջերմեռանդ հաւատով  
պաշտեցին Նրան ու ծառայեցին Նրա բարեխնամ  
կամքին՝ ամէն հարցում իրենց յոյսը դնելով Տիրոջ  
ամենակալ զօրութեան վրայ: Այդպիսիք ոչ միայն այս  
աշխարհում են երանելի կեանք ապրում, այլ նաեւ

դատաստանի օրը պարզերես են կանգնում Աստծոյ առաջ եւ Նրանից ընդունում են կեանքի ու փառքի երանութիւնը:

Այս եղանակով հոգեւորապէս մարգարէն ոչ միայն ինքն իրեն էր յորդորում հաստատուն մնալ՝ ըստ աստուած խօսքի, այլ նաեւ բոլոր ժողովուրդներին, ազգերին ու ցեղերին է ազդարարում խղճմտանքով կատարելապէս ապաւինել Աստծուն, ու ոչ թէ հարստութեանը, զօրութեանը եւ մարդկային բազկին: Այդ առաջին տեսակի ապաւինութեան՝ Աստծուն յուսալու վերաբերյալ Սաղմոսերգուն ասում է. «Սակայն իմ հոգին հնազանդ կը մնայ Աստծուն, քանզի Նրանի՛ց է իմ համբերութիւնը: Նա է Աստուածն իմ ու Փրկիչն իմ, ապաւենն իմ, որ չսասանուեմ: Աստծուց է զօրութիւնն ու փառքն իմ, Աստուած է օգնականն իմ եւ Աստծոյ վրայ է յոյսն իմ» (Սաղմ. 61:6-8): Իսկ ահա երկրորդ տեսակի՝ մարդկային յոյսի մասին էլ Դաւիթն ասում է հետեւեալը. «Ձեր յոյսը դրէ՛ք Նրա վրայ, ժողովուրդների ո՛րչք բազմութիւններ, բացէ՛ք Նրա առջեւ սրտերը ձեր, քանզի Աստուած օգնականն է մեր յաւիտեանս յաւիտենից: Սակայն ունայն են մարդկանց որդիները, սուտ են որդիները մարդկանց, իրենց կշռով անարդար են եւ իրենք ամենքն էլ ունայնութեան մեջ են: Յոյս մի՛ դրէք անիրաւութեան վրայ, յափշտակութիւն մի՛

ցանկացեք, եթե հարստութիւնն առուի պէս իսկ հոսի, թող ձեր սրտերը չցանկանան» (Սաղմ. 61:9-11):

Տեսնում ենք Նաեւ, որ սրբազան Պօղոս առաքեալը մեծ Նահապետ Աբրահամի հաստատուն յոյսի օրինակն է ցոյց տալիս բոլոր հաւատացեալներին. «Աբրահամը, որ անյուսութեան մեջ էր, յոյսով հաւատաց, որ ինքը կը լինի բազում ազգերի հայր, ինչպէս որ ասուել էր, թէ՛ այսպէ՛ս պիտի լինի քո սերունդը: Եւ Նա չերկմտեց իր հաւատի մեջ, թեպէտ Նայեց իր մարմնին արդէն իբրեւ մեռած մարմնի, – քանի որ հարիւր տարեկանի մօտ էր, – եւ Սառայի մեռած արգանդին: Բայց Աստծոյ խոստման վրայ չերկմտեց անհաւատութեամբ, այլ զօրացաւ հաւատով, փառք տուեց Աստծուն եւ հաստատապէս համոզուեց իր մտքում, թէ Նա, որ խոստացաւ, կատարելու կարո՞ղ է: Դրա համար այդ նրան որպէս արդարութիւն համարուեց» (Հռոմ. 4:18-22):

Սուրբ Գրքից այդ երանութիւնն են ստանում նրանք, ովքեր յուսացել են Աստծուն, իսկ ահա միւսներին, որոնք իրենց յոյսն Աստծուց կտրել են՝ «պաշտելով» իրենց չար կամքին, սպառնում է սոսկալի «վա՛յ»-ը. «Վա՛յ նրանց, որոնք Կայէնի ճանապարհով ընթացան եւ ըստ Բաաղամի մոլորութեան՝ սայթաքեցին վարձի յետեւից ընկնելով եւ

կորան Կորիսի պես իրենց ըմբոստութեան պատճառով» (Յուդա 1:11):

Այդ մասին է գրում նաեւ սուրբ Յովհան Ոսկեբերանը՝ ողբալով մեղքի մեջ ընկած Թեոդորոսի համար. «Չարը, խորամանկ լինելով, երբ տեսնում է, որ մեր խիղճը ծանրաբեռնուած է չարութեան գործերով, այդժամ յարձակուում եւ կապարից էլ անելի ծանր յուսահատութեամբ է կամենում պարուրել մեզ: Եւ եթէ մենք այն ներս ենք թողնում, ստիպուած ենք լինում այդ ծանրութեան պատճառով իսկոյն ցած ընկնել եւ շղթաներով կապուած՝ չարիքի խորքերն ընկղմուել: Այժմ այդտեղ ընկղմուած՝ տառապում ես նաեւ դու, քանի որ մի կողմ թողած քո հեզ եւ խոնարհ Տիրոջ պատուիրանները՝ այն դաժան բռնաւորի ու մեր փրկութեան անողոք թշնամու հրամաններն ես անխտիր կատարում: Դու քաղցր լուծը մի կողմ ես գցում եւ մերժում ես կրել թեթև բեռը, սակայն դրա փոխարէն ստրկութեան երկաթէ շղթաներով ես կապկալում՝ այդպիսով ասես էշի երկանաքար կախելով պարանոցիցդ» (Սբ. Յովհան Ոսկեբերան, Ճառ Ա):

Արդ, հաստատուն յոյսով եւ կենդանի հաւատով Աստծուն ծառայողներն իրենց կեանքի ընթացքում քանի դեռ այս աշխարհի վրայ են, արդարեւ ընդունում են աստուածային երանութիւնը, իսկ բարի

մահուամբ այս աշխարհից հեռանալով էլ՝ հոգով ներկայանում են աստուածային բարերարութեան առաջ ու ժառանգում են յաւիտենական կեանքի եւ փառքի վայելչութիւնը, որի մասին որ գրում է երջանիկ մարգարէ Դավիթը. «Տիրոջ աչքում յարգելի է մահն Իր սրբերի» (*Սաղմ. 115:15*):

Ուստի մենք, որ Աստծոյ շնորհներով ճանաչեցինք Նրա անյայտ ու ծածկուած իմաստութիւնը, մեր հայեացքը մահուանը յառելը եւ դէպի մահն ընթանալը գեղեցիկ ու զարմանալի մի վայր գնալ ենք համարում (*Բարսեղ ճոն, «Մեկնութիւն Մարկոսի Աւետարանի, ճառ Գ»*):

Արի՛ եւ տե՛ս, թէ որքան չար ու թշուառ կեանք է նրա՛նց կեանքը, ովքեր աստուածային ամենակարող զօրութեան հանդէպ հաստատուն յոյս չունեն, ինչի պատճառով էլ այդպիսիք մահուանից յետոյ զրկւում են աստուածային ամեն տեսակի փառքից՝ յաւիտենական չարաչար տանջանքներով լեցուն դժոխքն ընկնելով: Այդ մասին իսկ է այս խօսքը. «Մեղաւորի մահը չարաչար է» (*Սաղմ. 33:22*): Մահը, որ մարդու համար հանգիստ պիտի լինի, չափազանց սուկալի մի բան է ամբարիշտների համար, բանի որ մահը նրանց տանջանքների սկիզբն է (*Վանական վարդապետ, «Յոբի գրքի 9-րդ գլխի մեկնութիւնից»*):

Այս խօսքերի մասին մեզ ընդարձակ ծանուցում է տալիս մեր Նախահայրապետ Եւ Լուսաւորիչ սուրբ Գրիգորը. «Պատուական Է, - ասում է մարգարէն, - սուրբերի մահը՝ Ամենակալ Տիրոջ առաջ: Եւ ինչո՞ւ է սուրբերի մահը պատուական. որովհետեւ ճշմարիտ որոշմամբ ցոյց են տուել իրենց սէրն առաքինութեան գործերով՝ յաւիտենականների կեանքին արժանանալու յոյսն ունենալով:

Ինչո՞ւ է պատուական Աստծոյ սուրբերի մահը. որովհետեւ այս անցաւոր կեանքից փոխադրում են դէպի մշտնջենաւոր կեանք:

Ինչո՞ւ է պատուական Աստծոյ սուրբերի մահը. որովհետեւ այստեղի վշտագին նեղութիւններից փոխադրում են դէպի բարիքներով լեցուն հանգիստը:

Ինչո՞ւ է պատուական Աստծոյ սուրբերի մահը. որովհետեւ այս թշուառութիւնից ու եղկելի կեանքից փոխադրում են դէպի երանելի կեանքը:

Ինչո՞ւ է պատուական Աստծոյ սուրբերի մահը. որովհետեւ նրանք ազատւում են հոգու Եւ մարմնի ակամայ փորձութիւններից ու փոխադրում են դէպի անդորրութիւն:

Ինչո՞ւ է պատուական Աստծոյ սուրբերի մահը. որովհետեւ թողնելով ծերութիւնն ու տկարութիւնը՝ փոխադրում են վերստին նորոգուելու:

Ինչո՞ւ է պատուական Աստծոյ սուրբերի մահը. որովհետեւ այն նոյն սիրով, որով յաղթել են մարմնական բոլոր կարիքները, այդ նոյն սիրով փոխադրոււմ են Աստծոյ մօտ:

Ինչո՞ւ է պատուական Աստծոյ սուրբերի մահը. որովհետեւ նրանք երկրի վրայ մեռան մեղքերի համար եւ յոյսի փափագով կենդանացան, որպէսզի երբ Քրիստոս՝ մեր Կեանքը, յայտնուի, սուրբերն էլ նրա հետ փառաւորուեն:

Մեղաւորների մահը չար է, - ասում է մարգարէն, - իրենց դժնդակ, անսուրբ վարքի պատճառով: Իսկ նրանք, ովքեր ատում էին արդարներին՝ նրանց ողջախոհ խորհուրդների պատճառով, պիտի զրդջան, քանի որ գեհենի անշէջ հրին պիտի մատնուեն:

Ինչո՞ւ է մեղաւորների մահը չար. որովհետեւ նրանց վախճանը յուսահատութեամբ է լեցուն, քանի որ մեղանչեցին, սակայն չզղջացին, չապաշխարեցին եւ չհաշտուեցին Աստծոյ հետ:

Ինչո՞ւ է մեղաւորների մահը չար. որովհետեւ նրանք զրկուեցին հրեշտակների ժառանգութիւնից եւ ժառանգորդ դարձան դեւերի հետ ու մատնուեցին յաւիտենական տանջանքների, որոնք նրանց համար պատրաստուել են ամենքի Տիրոջ կողմից:

Ինչո՞ւ է մեղաւորների մահը չար. որովհետեւ հեռանում են այս աշխարհից, ուր ապրում էին

անզգայաբար ու չէին էլ մտածում մահուան օրուայ մասին, այն դեպքում, որ մահից յետոյ այլևս չեն կարող բարիք գործել ու որպես դրա վարձատրութիւն՝ մտնել Աստծոյ մօտ:

Ինչո՞ւ է մեղաւորների մահը չար. որովհետեւ լսելու են բոլորիս Տիրոջ խօսքը. «Անիծեալնէ՛ր, գնացէ՛ք Ինձնից յաւիտենական կրակը» (Մատթ. 25:41), քանի որ նրանք եղել են սատանայի կամակատարները, եւ ո՛չ թէ Աստուծոյ, Որն ամէն բան արարել է Իր բարի կամքով:

Ինչո՞ւ է մեղաւորների մահը չար. որովհետեւ կենդանարար ապաշխարութեան դռները փակուել են նրանց առաջ, ու նրանք այլևս չեն լսելու Տիրոջ խօսքը. «Դարձէք դէպի Ինձ, եւ ես կը դառնամ դէպի ձեզ» (Մաղ. 3:7): Այլ նրանց լսելի պիտի լինի այս խօսքը. «Նրանց դո՛ւրս հանեցէք արտաքին խաւարը, որովհետեւ չեն լսել Ինձ» (Մատթ. 22:13):

Արդ, մեր խղճմտանքն արթուն պահենք՝ ունկնդիր լինելով մեր ուղղափառ սուրբ Եկեղեցուն, եւ ջերմեռանդութեամբ խնդրենք ու նրա հետ երգենք. «Դու ես իմ յոյսը, Տէ՛ր, քաւիչն իմ յանցանք-



ների, մի՛ անտեսիր իմ արտասուքների հորդահոս  
աղբիւրը, եւ ողորմի՛ր ինձ, Աստուած»<sup>5</sup>:

Եւ, ի վերջո, աղերսակից լինենք մեր հրեշտա-  
կակրօն վարդապետ սուրբ Գրիգորին՝  
սրտի խորքերից աղաղակելով այսպէս.

Եւ այսպէս ահա, թէեւ թուլացաւ, հեռացաւ,  
վերացաւ,

Մասնատուեց, փախաւ, սլացաւ

Եւ տեղի տուեց կենդանութիւնն իմ կենցաղի,

Բայց քո պարգեւած յոյսը հաստատուն՝

պահուած է իմ մէջ,

Որպէս մնայուն եւ անջնջելի յիշատակարան:

Տե՛ս ողորմութեամբ տարակուսանքները

վտանգեալիս,

Միա՛յն բարեգութ ու փառաբանուած

Որդիդ Աստծոյ,

Որպէսզի քաւես, բժշկես Դու ինձ եւ

կենագործես,

Պաշտպանես, նորոգես, նկարես, կանգնես,

հաստատես

Եւ վերստին ստեղծագործես երջանիկ

անարատութեամբ:

---

<sup>5</sup> Ապաշխարութեան այս շարականը («Ողորմեա՛» ապաշ-  
խարութեան, բկ) երգում է պահոց օրերին՝ Գիշերային  
ժամերգութեան ժամանակ, ինչպէս եւ, ըստ հարկի, այլ  
ծիսապաշտական արարողութիւնների ընթացքում եւս:

Քոնն են կարողութիւնը, փրկութիւնն ու  
ողորմութիւնը.  
Չունես Դու անկարողութիւն, այլ՝ լիովի  
գօրութիւն.  
Բարձրութիւն, իշխանութիւն, անվախճան  
թագաւորութիւն,  
Իսկութիւն, ինքնութիւն, ամենուրեք  
բացարձակութիւն,  
Բարեբարութիւն, լուսաւորութիւն:  
Փառաւորեալ ես Դու տիրապէս, անպակաս եւ  
անյաւելլուած,  
Խնկուած՝ խորհուրդով անբացատրելի Սուրբ  
Երրորդութեամբդ,  
Նաեւ առյաւէտ գովաբանուած՝  
Չաւասարազօր եւ համապատիւ  
համագոյութեան երկրպագութեամբ,  
Երեկ եւ այսօր եւ յաւիտեանս յաւիտենից. Ամէն:  
(Սբ. Գրիգոր Նարեկացի, «Մատեան ողբերգու-  
թեան», Բան 3Գ)

## Գլուխ Դ.

### ՍԻՐՈՅ ՄԱՍԻՆ

Եկեք խօսենք Աստծոյ հանդէպ անխարդախ, ճշմարիտ եւ երանաւետ սեր ունենալու հրաշագարդ կարողութեան մասին, որը յիշատակուում է Հին եւ Նոր Կտակարանների օրէնքների ու պատուիրանների մէջ: Սրանք անդրժելի հրամաններ են՝ սիրելու համար Աստծոյ ամենակալ եւ ամենակարող զօրութիւնն ու անսահման մեծութիւնը. «պիտի սիրես քո Տէր Աստծուն քո ամբողջ սրտով, քո ամբողջ հոգով, քո ամբողջ մտքով եւ քո ամբողջ զօրութեամբ» (*ԲՕրին. 6:5, Մարկ. 12:30*):

Այս մասին է գրում Նաեւ մեր երանելի սուրբ վարդապետ Իգնատիոսը. «Մեծագոյն բարի արարքն Աստծուն սիրելն է, որը, օրէնքի մէջ ամրագրուած լինելով, Նաեւ աւետարանուեց Տիրոջ կողմից: Յարկ է մեր ամբողջ զօրութիւնն ու ամբողջ կամքը դէպի Նա ուղղել, եւ մերժել այն ամէնը, ինչը հակասում է Աստծոյ հանդէպ սիրուն: Իսկ նրանք, ովքեր կարծում են, թէ բարիք են գործում, սակայն

իրենց արարքներով մերժում են այն սերը, որն Աստծոյ մօտ է<sup>6</sup>, այդպիսիք պիտի հրաժարուեն իրենց այդ չարաբարոյ ու վնասակար բարեպաշտութիւնից եւ միայն Աստծոյ սերը պիտի հայցեն» (*Սուրբ Իգնատիոս Աստուածագգեաց, «Մեկնութիւն Ղուկասի Աւետարանի*):

Ահա այս սքանչելի սերն է երանութեան այն մշտաբաց դուռը, որի մասին սուրբ Գրիգոր Աստուածաբանը գրում է. «Այնքա՛ն հրաշալի է այս դուռը, որ այս դռնով մշտապէս կարող ենք համարձակօրէն ներս մտնել ու մօտենալ Աստծուն: Եւ Ինքը՝ Աստուած էլ, որ ըստ ամենայնի անբովանդակելի է, այս նոյն դռնով դէպի մեզ է գալիս ու Իր մարդասիրութեամբ հաճում է բնակուել մեր մէջ»: Ինչպէս վկայում է սրբազան Յովհաննէս Աւետարանիչը՝ «Աստուած

---

<sup>6</sup> Սուրբ Իգնատիոս հայրապետը, «Աստծոյ մօտ գտնուող սեր» ասելով, արտայայտում է Յովհաննէս առաքեալի այն աստուածաբանութիւնը, համաձայն որի՝ Բանն Աստուած՝ մարդացած Քրիստոս Ինքն է կատարեալ սերը: Իր Աւետարանի առաջին իսկ համարում առաքեալն ասում է. «Սկզբից էր Բանը, եւ Բանը Աստծոյ մօտ էր, եւ Բանը Աստուած էր» (*Յովհ. 1:1*): Յետեւաբար, «Աստծոյ մօտ գտնուող սերը» մերժողները նրանք էին, ովքեր մերժում էին Քրիստոսին՝ հրաժարուելով ապրել ըստ քրիստոսաւանդ պատուիրանների:

սեր Է. Եւ ով սիրոյ մէջ Է ապրում, բնակւում Է Աստծոյ մէջ, եւ Աստուած բնակւում Է նրա մէջ» (Ա Յովհ. 4:16):

Ահա այս սիրոյ հոգեղէն դուռն Ինքը՝ Աստուած հաստատեց, քանի որ այս սքանչելի դռնով Աստծոյ Միածին Որդին՝ մեր Փրկիչ Յիսուս Քրիստոս առաքուեց աշխարհ՝ մարդկութեան փրկութեան համար, որի մասին գրուած Է. «Սրան՝ Է սերը. մենք չէ, որ սիրեցինք Աստծուն, այլ նա՛ սիրեց մեզ եւ ուղարկեց Իր Որդուն մեր մեղքերի քաւութեան համար» (Ա Յովհ. 4:10): Սրբազան անետարանչի այս խօսքի վերաբերեալ մեր սուրբ վարդապետ Սարգիս Շնորհալին գրում Է. «Սրան՝ Է, - ասում Է, - սերը. մենք չէ, որ սիրեցինք Աստծուն: Այս ասելով՝ մեր ապերախտութիւնն Է ցոյց տալիս, եւ դրան հակառակ՝ Աստծոյ անեզր մարդասիրութիւնը: Քանի որ ոչ թէ մենք ելանք Աստծուն փնտրելու, ոչ թէ մենք գտանք Նրան ու սիրեցինք այնպէս, ինչպէս պարտաւոր էինք սիրել՝ այդպիսով երախտագետ լինելով մեզ տրուած պարգեւների համար, այլ նախ նա՛ սիրեց մեզ, ինչպէս ասում Է Աւետարանիչը: Սիրեց մեզ, չնայած որ մենք հակառակորդ ու թշնամի էինք Նրան: Եւ սիրեց անեզր սիրով ու Իր Հայրական ողորմութեամբ գթաց մեզ, եւ թէպէտ մենք մեղքեր ու անօրինութիւններ էինք գործում, նա խնամակալ եղաւ մեզ: Եւ առաքեց Իր Որդուն՝ մեր մեղքերի

բաւութեան համար, այսինքն՝ Արդարին ուղարկեց անարդարներին համար մեռնելու եւ այդպիսով մեզ փրկելու: Եւ Սուրբը՝ պիղծերիս, ու Անմեղը՝ մեղաւորներին համար մեռաւ: Եւ եթէ այնժամ, քանի դեռ թշնամացած էինք Աստծուն, Նրա հետ հաշտուեցինք Աստուածորդու մահուամբ, ինչպէս որ ասում էր Պօղոսը, ապա որքա՛ն առաւել կենսունակ պիտի դառնանք Աստծոյ հետ հաշտուելուց յետոյ՝ Աստուածորդու կեանքով ապրելով» (Սբ. Սարգիս Շնորհալի, «Մեկնութիւն Ա Յովի. 4:10, ճառ Է»):

Ահա թէ ինչու իւրաքանչիւրս էլ պարտաւոր ենք, հոգեւորագ Դաւիթ մարգարէին ձայնակից լինելով, ողջ սրտով աղաղակել մեր Փրկիչ Աստծուն, Որի անունը Սէր է. «Սիրում եմ Քեզ, Տէ՛ր, զօրութի՛նս իմ, ո՛վ Տէր, պահպանի՛չ իմ, ապաւէ՛նս իմ եւ փրկի՛չ» (Սաղմ. 17:2):

Արդ, եթէ կամենում ենք տեսնել, որ սերը առաքիւնութեան բոլոր գործերից ամենագերագանցն է, ուրեմն հոգու աչքերով խորասոյգ լինենք սրբազան Պօղոս առաքեալի խօսքերի մէջ, որը սիրոյ զօրութիւնը համեմատութեան մէջ դնելով միւս առաքիւնութիւնների հետ՝ սերն ամեն բանից աւելի մեծ է համարում եւ հաստատագրում է, որ ոչ միայն փոքր, այլեւ ամենամեծ առաքիւնութիւններն առանց սիրոյ լծորդութեան որեւէ օգուտ չեն կարող ունենալ:

Ըստ այդմ՝ առաքելալը գրում է. «Եթե խօսեմ մարդկանց լեզուները եւ հրեշտակներինը, բայց սեր չունենամ, կը նմանուեմ մի պղնձի, որ հնչում է, կամ ծնծղաների, որ ղօղանջում են: Եւ եթե մարգարե- ութիւն անելու շնորհ ունենամ եւ հասկանամ բոլոր խորհուրդներն ու ամբողջ գիտութիւնը, եւ եթե ունենամ ամբողջ հաւատը՝ մինչեւ իսկ լեռները տեղափոխելու չափ, բայց սեր չունենամ, ոչինչ եմ: Եւ եթե իմ ամբողջ ունեցուածքը տամ աղքատներին եւ իմ այս մարմինը մատնեմ այրուելու, բայց սեր չունենամ, ոչ մի օգուտ չեմ ունենայ: Սերը համբերող է, քաղցրաբարոյ է. սերը չի նախանձում, չի ամբար- տաւանանում, չի գոռոզանում, անվայել վարմունք չի ունենում, իրենը չի փնտռում, բարկութեամբ չի գրգռում, չար բան չի խորհում, անիրաւութեան վրայ չի ուրախանում, այլ ուրախանում է ճշմար- տութեան վրայ. ամէն բանի դիմանում է, ամէն բանի հաւատում է, մշտապէս յոյս է տածում, ամէն բանի համբերում» (Ա Կորնթ. 13:1-7):

Երանի՛ նրանց, ովքեր այսօրինակ աստուածա- սիրութեան սքանչելի զօրութիւնն ունեն իրենց անձերում: Այդպիսիք համարձակօրէն կարող են ձայնակից լինել սրբազան Պօղոս առաքելալին նաեւ այս խօսքերում. «Արդ, ո՞վ պիտի բաժանի մեզ Քրիս- տոսի սիրուց. տառապա՞նքը, թե՞ անձկութիւնը, թե՞

հալածանքը, թե՞ սովը, թե՞ մերկութիւնը, թե՞ վտանգները, թե՞ սուրը, ինչպէս գրուած էլ է. «Քեզ համար ենք մեռնում ամէն օր. համարուեցինք որպէս ոչխար սպանդի համար»: Բայց այս բոլորից է՛լ անլի յաղթական ենք դուրս գալիս Նրա միջոցով, ով սիրեց մեզ. որովհետեւ վստահ եմ, թէ ո՛չ մահը, ո՛չ կեանքը, ո՛չ հրեշտակները, ո՛չ իշխանութիւնները, ո՛չ այլ բաներ, որ այժմ կան, ո՛չ գալիքները եւ ո՛չ զօրութիւնները, ո՛չ բարձրութիւն, ո՛չ խորութիւն եւ ո՛չ մի ուրիշ արարած չի կարող բաժանել մեզ Աստծու այդ սիրուց, որ կայ մեր Տէր Քրիստոս Յիսուսով» (Յռոմ. 8:35-39):

Առաքելական այս պանծալի խօսքերի զօրութեան համար հաստատուն հիմք է ծառայում մեր Տէր Յիսուս Քրիստոսի անժխտելի հրամանը. «Ինչպէս Իմ Հայրն Ինձ սիրեց, ես էլ ձեզ սիրեցի. Իմ սիրոյ մէջ հաստատո՞ւն մնացէք: Եթէ Իմ պատուիրանները պահէք, կը մնաք Իմ սիրոյ մէջ, ինչպէս ես Իմ Հօր պատուիրանները պահեցի եւ մնում եմ Նրա սիրոյ մէջ» (Յովհ. 15:9-10):

Ահա այս ամէնի պատճառով է, որ մենք պարտաւոր ենք մեր անձերը հեռու պահել աշխարհասիրութիւնից ու փառասիրութիւնից, տեղի չտալ անձնասիրութեանը եւ արծաթասիրութեանը, քանի որ, եթէ այդպէս վարուենք, աստուածասիրութեամբ



Աստծուն բարեկամ դառնալու փոխարեն մեր աշխարհասեր հոգով Աստծուն թշնամի եւ Նրա կողմից իսկապէս ատելի կը դառնանք՝ ըստ սրբազան Յակոբոս առաքեալի այս խօսքի. «Շնացողնէ՛ր, չգիտէ՞ք, որ սերը այս աշխարհի հանդէպ՝ թշնամութիւն է Աստծոյ դէմ, քանի որ, ով ուզում է աշխարհը սիրել, Աստծուն իրեն թշնամի կ'անի» (Յակ. 4:4):

Արդ, ի՞նչ անենք, եղբայրնէ՛ր, որպէսզի ճշմարիտ աստուածասիրութեան զօրութիւնն ու ներգործութիւնը մեր անձերում սեփականենք: Մեր երկնաւոր Վարդապետ ու Փրկիչ Յիսուս Քրիստո՛ս է դա մեզ ուսուցանում. «Ով իմ պատուիրաններն ընդունում եւ դրանք պահում է, նա՛ է, որ Ինձ սիրում է. եւ ով Ինձ սիրում է, պիտի սիրուի իմ Հօրից. ես էլ Նրան պիտի սիրեմ եւ Ինձ պիտի յայտնեմ Նրան» (Հովհ. 14:21):

Եթէ փութանք կատարել օրէնքի եւ պատուիրանների աստուածային պատգամները, այդժամ կարող կը լինենք նաեւ համարձակաբար, մեր խղճի ձայնով երգակից լինելու հոգեւուազ Դաւիթ մարգարէին ու բացականչելու. «Ատեցի անօրէններին եւ Քո օրէնքը սիրեցի» (Սաղմ. 118:113), եւ թէ՛ «Ատեցի ու արհամարհեցի մեղքը, եւ Քո օրէնքը սիրեցի» (Սաղմ. 118:163):

Արդ, եթէ կամենում ենք մեր աստուածասիրութեան մեջ բազմատեսակ, հոգեպարար քաղցրու-

թիւն վայելել, ուրեմն ունկնդիր լինենք մեր Նախահայրապետ եւ Լուսաւորիչ սուրբ Գրիգորին. «Սուրբ սերը մայրն է առողջութեան, անարատութեան ու անթծութեան, որ ինձամում ու յորդորում է առաքինութիւն գործելու եւ յարդարում է բազմատեսակ բարեգործութիւններով:

Սերը բոլոր բարիքների աղբիւրն է, որն արբեցնում է սուրբ անձերին: Այն գրաւականն է Աստծուց բաշխուող բոլոր երանութիւնների ու մեծամեծ պարգեւների:

Սերը բխեցնողն է Քրիստոսի երախտիքների, Նրա անպատմելի շնորհների վայելքներն ընծայողն է, խոռովութիւնները լուծարողը եւ խաղաղութեան պարգեւիչը, մտքի ու մարմնի անդամների լուսաւորիչը:

Սուրբ սերը հոգու եւ մարմնի անեղծելի ստացուածքն է նրանց համար, ովքեր մշտապէս կրում են այն իրենց մէջ: Այդպիսիք օժտուած են Քրիստոսի կենդանի շնորհներով՝ յարդարուելով ամենաօգտաւետ երանութիւններով՝ ի գովեստ Աստծոյ փառքի:

Սերը կենդանի յոյսի աւետիսն է, նեղութեան ու վշտերի սփոփիչն եւ լուծիչն այն բոլոր վերահաս դժնդակութիւնների, որոնք զինուել են առաքինութեան սխրագործութիւնների դէմ:

Սերն իր սուրբ երախտիքներով մի խաղաղարար հրեշտակ է, որ մերժում է ցասումը եւ լուծարում է խռովութիւնը, դուրս է մղում նախանձն ու խոնարհեցնում է չարին:

Սուրբ սերը վայելուչ այգի է, որն իր խաղողով ու գինով զուարթացնում է տրտմութիւններով լցուած սիրտն ու զգայարանները եւ ուրախացնում է Տիրոջ կամքով:

Սուրբ սերը պտղալից ձիթենի է, որը բարեխոհ մարդու սրտին ձէթ է մատակարարում՝ լուսաւորելու համար նրա հոգեւոր իմացութեան ուղին եւ օծելու նրա մարմնական անդամները՝ զուարթութիւն պարգեւելով նրան:

Սուրբ սերը հոգեւոր կարգերի յարդարիչն է եւ մարմնական վարքի յանձնարարիչը, որն այս երկուսն իրար է կապում ու թոյլ չի տալիս բաժանել եւ քայքայել ընդհանրական բարիքը:

Սուրբ սերը բանալին էԿեանքի Դռան, որը կեանք է բաշխում: Այդ սերը սուրբ անձերին Աստծոյ աներեւոյթ շնորհների գանձերն է պարգեւում, այն դժնդակ վարքի խափանիչն ու մեղքերի դէմ մարտընչողն է: Քանի որ առաքինութեան բոլոր արուեստներն էլ սիրոյ միջոցով են յարդարում սրբութեամբ ու արդարութեամբ: Եւ սիրոյ միջոցով են ցոյց տալիս իրենց բարութեան գործերը,

որովհետեւ այն չարը ուղղողն է եւ բարութեան յորդորողը, աստուածասերների զօրավիգն ու խորամանկների եւ մեղսասերների կործանիչը:

Սուրբ սերը հաւատքի ու յոյսի հետ միաբանելու արդիւնքում ծնւում է բարեպաշտ վարքը, եւ այդ երեքի խաղաղ միակեցութեամբ ի յայտ են գալիս լուսաւոր կարգերը: Որովհետեւ առաքիլութեան հետ մեկտեղ այդ երեքը պատճառ են դառնում, որ անձը երկնաւոր Զօր քաղցրանուշ յոգածութեան լուսատու թագով պսակադրուի ու վայելի Նրա անվախճան եւ անպատում բարիքները:

Քանի որ Նրանք, ովքեր սուրբ սիրոյ ինսամքներն է տածում ամենքի՝ հեռաւորների եւ մերձաւորների, հոգիների ու մարմինների հանդէպ, Նրանք սուրբ սիրոյ երանութիւններով ամենայն ճշմարտութեամբ օրհնուելով Ամենասուրբ Երրորդութեան կողմից՝ պսակադրում ու մեծարում են եւ մշտնջենաւոր ինդութեամբ վայելում են Տիրոջ անվախճան ու որբէ բանի հետ անհամեմատելի բարիքները» *(Յաճախապատում, ճառ ԺԱ)*:

Գլուխ Ե.  
ՄԿՐՏՈՒԹԵԱՆ ՄԱՍԻՆ

Այժմ մօտենանք Մկրտութեան սրբարար խորհրդի մասին ուսմունքին, որը մեր Տէր Յիսուս Քրիստոս Ինքը սահմանեց Իր սրբազնասուրբ Անձով, երբ խոնարհուեց Յորդանան գետի ջրերի մէջ ու յանձն առաւ մկրտուել Իր ծառայի ձեռքով. «Այն ժամանակ Յիսուս Գալիլիայից Յորդանան եկաւ, Յովհաննէսի մօտ՝ նրանից մկրտուելու: Իսկ Յովհաննէսն ընդդիմացաւ նրան ու ասաց. «Ի՞նձ պէտք է, որ քեզկից մկրտուեմ, եւ դու ի՞նձ մօտ ես գալիս»: Յիսուս պատասխանեց եւ ասաց նրան. «Թո՛յլ տուր հիմա, որովհետեւ այսպէս վայել է, որ մենք կատարենք Աստծու ամեն արդարութիւն»: Եւ ապա նրան թոյլ տուեց: Եւ երբ Յիսուս մկրտուեց, իսկոյն ջրից դուրս ելաւ. եւ ահա երկինքը բացուեց նրան, եւ նա տեսաւ Աստծու Յոգին, որն իջնում էր ինչպէս աղանի եւ գալիս էր իր վրայ: Եւ ահա՝ մի ձայն երկնքից, որ ասում էր. «Դա՛ է իմ սիրելի Որդին, որն ունի իմ ամբողջ բարեհաճութիւնը» (Մատթ. 3:13-17):

Մկրտութեան ահա այս սրբազան խորհուրդը բազմատեսակ շնորհներով ներգործում է մկրտուողների հոգիների վրայ, եւ այս խորհուրդն առաջինն է բացում երկնքի արքայութեան կեանքի ու փառքի դուռը, ինչի մասին որ մեր Փրկիչ Յիսուս վճռակասօրէն աւետարանեց հրեաների Նիկողէմոս աւտուով իշխանին. «Ճշմարիտ, ճշմարիտ եմ ասում քեզ, եթէ մէկը ջրից ու Յոգուց չձնուի, չի կարող Աստծու արքայութիւնը մտնել» (Յովհ. 3:5):

Իսկ երբ «ծագեց» մեր Տէր Յիսուս Քրիստոս՝ արդարութեան Արեգակն ու աշխարհի Փրկիչը, առաջինն ինքը կատարեց եւ լրացրեց պակասութիւնը, քանի որ բաց արեց Նոր շնորհների կենսաբեր դռները՝ Աւագանի լուսաւորութեան միջոցով Ամենասուրբ Երրորդութեան հանդէպ ուղղափառ հաւատք հաստատելով (*Յաճախապատում, ճառ ԺԳ*):

Նոյն մտքի մասին է գրում Երուսաղէմի հայրապետ սուրբ Կիւրեղը՝ իր խօսքն ուղղելով այն Նորահաւատներին, որոնք մօտենում են Մկրտութեանը. «Ուրեմն, քանի որ մարդը երկակի է՝ բաղկացած հոգուց և մարմնից, այդ երկուսն էլ պիտի մաքրուեն. անմարմինը՝ անմարմնով, իսկ մարմնաւորը՝ մարմնաւորով: Արդ, ջուրը մաքրում է մարմինը, իսկ Սուրբ Յոգին կնքում է հոգին, որպէսզի Սուրբ Յոգով ցողուած սրտով և մաքուր ջրով լվացուած մարմնով

կարողանանք մօտենալ Աստուածութեան մեծութեանը: Արդ, երբ դու սուզուես Մկրտութեան ջրի մէջ, այդ ջուրը սովորական մի ջուր մի՛ համարիր, այլ Սուրբ Հոգու զօրութեամբ այդ ջրից փրկութիւն ակնկալիր: Քանի որ առանց այս երկուսի անհնար է, որ դու կատարեալ լինես: Այս ասողը ես չեմ, այլ Ինքը՝ Տէր Յիսուս Քրիստոս, Որ իշխանութիւն ունի այս հարցում եւ այսպէս է ասում. «Եթէ մարդ չձնուի ջրից եւ Սուրբ Հոգուց, չի կարող մտնել Աստծոյ արքայութիւն»: Եւ ոչ էլ նա, ով թեպէտ ջրով մկրտուել է, սակայն արժանի չի եղել Սուրբ Հոգին ընդունելուն, կարող կը լինի կատարեալ շնորհի ստանալ: Եւ նոյնիսկ նա, ով թեպէտ բազմաթիւ պիտանի գործեր է արել, սակայն Մկրտութեան ջրով Սուրբ Հոգու դրոշմը չի ստացել, անկարող կը լինի Երկնքի արքայութիւն մտնել» (Սբ. Կիլրեղ Երուսաղէմացի, «Կոչումն ընծայութեան», Բան Գ):

Տե՛ս, թէ սրբարար Մկրտութիւնը մեզ ինչպիսի՛ սքանչելի շնորհներ է պարգեւում, քանի որ մեզ հաղորդակից է դարձնում մեր Կենսատու Յիսուս Քրիստոսի փրկարար զօրութեանը եւ կամաւոր մահուանը: Ուրեմն, ինչպէս որ Քրիստոսի մահը ոչնչացրեց մեր սկզբնական մեղքի զօրութիւնը, նոյնպէս եւ Մկրտութեան խորհուրդն է մեր միջից ոչնչացնում մեղքի ներգործութիւնը: Իսկ Աւագանի

ջրի մէջ երեքանգամեայ ընկղմումը խորհրդանշում է Քրիստոսի երեքօրեայ թաղումը, մկրտուողին Աւագանից դուրս հանելը՝ Յիսուսի Յարութեան խորհուրդը, ինչպէս որ յայտնապէս հաստատում են այս մասին առկայ վկայութիւնները. «Կամ չգիտե՞ք, թէ մենք բոլորս, որ մկրտուեցինք Յիսուս Քրիստոսով, Նրա մահով է, որ մկրտուեցինք: Մկրտութեամբ թաղուեցինք Նրա հետ մահուան մէջ, որպէսզի, ինչպէս որ Քրիստոս մեռելներից Յարութիւն առաւ Զօր փառքով, նոյնպէս եւ մենք քայլենք նոր կեանքով. որովհետեւ, եթէ Նրա մահուան նմանութեամբ տնկակից եղանք Նրան, պիտի լինենք նաեւ Նրա Յարութեան նմանութեամբ» (*Հռոմ. 6:3-5*):

«Մկրտութիւնը խաչ է, որ խորհրդանշում է Քրիստոսի խաչելութիւնը: Մկրտութիւնը նաեւ գերեզման է մեզ համար. Քրիստոս մարմնով մեռաւ եւ թաղուեց, մենք նոյնպէս մեղքի համար խաչուում եւ մեռնում ու գերեզմանի մէջ ենք թաղում մեր մեղքերը» (*Սբ. Յովհան Ոսկեբերան, ճառ Ժ*):

«Սրբարար Մկրտութեամբ մկրտուածը ջրի մէջ երեքանգամեայ ընկղմամբ կենսապարգեւ Յիսուսի աստուածախորհուրդ մահուան եւ երեքօրեայ թաղման նմանութիւնն է ստանում» (*Սբ. Դիոնիսիոս Արիոսպագացի, «Եկեղեցական քահանայութեան մասին», մաս 2-րդ, գլուխ Բ*):



Այն նոյն խորհրդով, որով Յիսուս եկաւ եւ աշխարհի մեղքն իր վրայ վերցրեց ու մեռաւ, որպէսզի մահը ոչնչացնի եւ իր Յարութեամբ հաստատի յարութիւնը, այդ նոյն խորհրդով էլ դու ես ջրի մէջ ընկղմուում, ինչպէս որ ասուում է. «Մկրտութեան ջրի մէջ «թաղուելով», ինչպէս Յիսուս թաղուեց գերեզմանում, դու պիտի յարութիւն առնես Նրա միւսանգամեայ Գալստեան ժամանակ՝ կենդանութեամբ նորոգուելու համար» (Սբ. Կիւրեղ Երոսուաղեմացի, «Կոչումն ընծայութեան», Բան Գ):

«Մկրտուածները հրաժարուում են սատանայից, եւ նրանց մէջ մեռցուում է մեղքերի պատճառած մահը, որպէսզի երկրի վրայ այլեւս չապրեն մեղքերով: Քանի որ ինչպէս մեռեալն է մնջանում՝ անկարող դառնալով որևէ բան անելու, այդպէս էլ մկրտուածը մեռնում է մեղքերի համար եւ կենդանանում՝ արդարութեան համար, որովհետեւ նա Քրիստոսի կերպարանքն է առնում՝ Սուրբ Երրորդութեան շնորհներով: Այդուհետեւ նա սկսում է խորհել վերնային բաների մասին՝ ըստ Աւետարանի ճշմարիտ քարոզութեան, որը հաճելի է Ամմահ Թագաւորին, եւ այդպիսով արդար, ճշմարիտ ու սուրբ վարքով հասնում է անմահների Կեանքի օթեան՝ Յիսուս Քրիստոսի մօտ:

Այսպես է իրականանում հոգեւոր Աւազանից վերստին ծնունդը. ախտաւորը վերստին է ծնւում առանց ախտի, Ամենասուրբ Երրորդութեան շնորհներով ու մարդասիրութեամբ: Այդ մկրտուածները ո՛չ արիւնից են ծնւում, - ասում է, - եւ ոչ էլ մարդու կամքից, այլ Աստծո՛ւց ծնուեցին» *(Յաճախապատում, ճառ Բ):*

Մկրտութեան սրբարար խորհուրդը մարդկանց որդիներին Աստծոյ որդիներ է դարձնում եւ համարձակութիւն է տալիս արժանաւորապէս ասելու.

Հայր մեր, որ յերկինս ես,  
սուրբ եղիցի անուն Քո:  
Եկեսցէ արքայութիւն Քո:  
Եղիցին կամք Քո  
որպէս յերկինս եւ յերկրի:  
Չհաց մեր հանապազորդ  
տո՛ւր մեզ այսօր:  
Եւ թո՛ղ մեզ զպարտիս մեր,  
որպէս և մեք թողումք  
մերոց պարտապանաց:  
Եւ մի՛ տանիր զմեզ ի փորձութիւն:  
այլ փրկեա՛ զմեզ ի չարէ:  
Չի քո է արքայութիւն  
եւ զօրութիւն եւ փառք յաւիտեանս. ամէն

(Մատթ. 6:5):

Իսկապես, «նրանք, ովքեր առաջնորդում են Աստծոյ Յոգով, նրանք են Աստծոյ որդիները. քանի որ չստացաք ծառայութեան հոգին վերստին երկիւղի մէջ ընկնելու համար, այլ ստացաք որդեգրութեան հոգին, որով աղաղակում ենք՝ Աբբա Յայր: Նոյն Ինքը Յոգին վկայում է մեր հոգուն, թէ Աստծոյ որդիներ ենք. եւ եթէ որդիներ ենք, ապա եւ՝ ժառանգներ. ժառանգներ Աստծոյ եւ ժառանգակիցներ Քրիստոսի» (Յռոմ. 8:14-17):

Եւ եթէ հաւատում ենք, որ Նա, Ով բնութեամբ Աստծոյ Որդի էր, եկաւ եւ շնորհի միջոցով մարդու որդի դարձաւ՝ ծնուելով Կոյսից, ուրեմն նմանապես պիտի հաւատանք Նաեւ, որ մենք՝ բնութեամբ Ադամի որդիներ լինելով, կարող ենք մեր այդ մարդկային բնութեամբ «կոյս» Աւագանից ծնուելով՝ շնորհի միջոցով Աստծոյ որդիներ դառնալ: «Դրա համար էլ, - ասում է սուրբ Սարգիս Շնորհալին՝ Յակոբոս առաքեալի Ընդհանրական Նամակի մեկնութեան մէջ, «Նա Իր կամքով ծնեց մեզ ճշմարտութեան խօսքով» (Սբ. Սարգիս Շնորհալի, Մեկնութիւն Յակ., 1:18, ճառ Դ)»:

Իսկ սուրբ Խոսրով Անձեւացին Պատարագի խորհրդի իր մեկնութեան մէջ ասում է. «Աւագանը մեզ վերստին ծնում է, որպէսզի մենք որդիանանք

Աստծուն: Այն մեզ ազատում է մեղքերից՝ կենսագործելով անմահական կեանքով» (Սբ. *Խոսրով Անծեւացի*, «Մեկնութիւն Պատարագի»):

Շարականի մէջ էլ ասում է. «Այսօր փարատուեցին նախամօր ծննդեան երկունքի տրտմեցուցիչ եւ խաւարաստեղծ ցաւերը, քանի որ մահուան եւ ապականութեան եւթակայ մարմնով ծնուածները Սուրբ Հոգու կողմից ծնում են վերստին՝ երկնաւոր Հօր լոյսի որդիները լինելու համար» (Շարակնոց):

Դարձեալ, Սուրբ Հոգի Աստուած Քրիստոսի կամաւոր եւ փրկարար մահուան խորհրդով մկրտուածներին մաքրագարողում է սկզբնական մեղքի ախտից ու Իր շնորհներով նրանց դարձնում է տաճար՝ այնտեղ բնակուելու համար: Ահա թէ ինչու է սրբազան Պօղոս առաքեալը գրում հետեւեալը. «Չգիտե՞ք, որ Աստծու տաճար էք դուք, եւ Աստծու Հոգին է բնակւում ձեր մէջ» (Ա Կորնթ. 3:16):

Իսկ ահա Սուրբ Գրիգոր Նարեկացին, խօսելով մկրտութեան խորհրդի մասին, ասում է.

Չիրք շնորհեց, քաւութիւններ հանդերձեց,  
Քրիստոսի մահուամբ մկրտուածներիս  
Իր բնակութիւնը մաքրագործեց,  
Որին Հօր եւ Որդու հետ  
Նաեւ Սուրբ Հոգին ներգործեց  
Եւ ինքն Աստուած է՝

Խնկուած տիրապէս

Ամենայնը եւ ամենայնի մէջ:

(Սբ. Գրիգոր Նարեկացի, «Մատեան ողբերգութեան», Բան ԼԴ)

Պետրոս առաքեալն էլ իր ընդհանրական նամակում գրում է. «Եւ դուք, իբրեւ կենդանի վէմեր, կառուցուում էք որպէս հոգեւոր տաճար, որպէս անարատ քահանայութիւն, որպէսզի Յիսուս Քրիստոսի միջոցով մատուցէք հոգեւոր պատարագներ, որոնք հաճելի լինեն Աստծուն» (Ա Պետ. 2:5): Առաքեալի այս խօսքը մեկնելով՝ սուրբ Սարգիս Շնորհալին ասում է. «Դարձեալ, եթէ մէկն անարատ քահանայութիւնը եւ հոգեւոր պատարագը չվերապահի միայն օծեալ քահանային, այլ այն ընդունելի համարի առհասարակ համայն ժողովրդի համար, որեւէ կերպ չի մեղանչի ճշմարտութեան դէմ, քանի որ, ինչպէս երեւում է, այդ իշխանութիւնը պարգեւուեց բոլոր առաքիլի անձանց՝ լինելու հոգեւոր տաճար եւ անարատ քահանայ՝ հոգեւոր պատարագ մատուցելու համար: Ոչ այլ ինչ, քան միայն սեփական հոգին եւ միտքը՝ մարմնով հանդերձ, աստուածային հրով ողջակիզել Աստծոյ սիրո սուրբ Սեղանի վրայ: Դա այն բանական եւ կենդանի պատարագն է, որի մասին խոսում է մարգարէն. «Խոնարհ հոգին է, - ասում է, - պատարագն Աստծոյ, մաքուր սիրտն ու

խոնարհ հոգին Աստուած չի արհամարհում...»  
(Սաղմ. 50:19):

Այս հոգեւոր պատարագի մեծութիւնը տեսած լինելով՝ աստուածը նկատ<sup>7</sup> Պօղոսը Հռոմեացիներին ուղղուած նամակում (Հռոմ. 12:1) պաղատագին ձայնով պահանջում է մաքուր հոգիներ ունենալ՝ այսպէս ասելով. «Աղաչում եմ ձեզ, եղբայրներ, ողորմութեամբ Աստուծու, որ պատրաստէք ձեր մարմինները որպէս զոհ կենդանի, սուրբ, աստուածահաճոյ. ա՛յդ է ձեր բանական պաշտամունքը» (Սբ. Սարգիս Շնորհալի, Մեկնութիւն Ա Պետ., 2:5, ճառ Դ):

---

<sup>7</sup> Աստուածակիր, Աստուծուն իր մէջ ունեցող, կրող:

## Գլուխ 2. ԱՊԱՇԽԱՐՈՒԹԵԱՆ ՄԱՍԻՆ

Արդ, Քրիստոսի սուրբ Եկեղեցու սուրբ խորհուրդներից մեկն էլ ապաշխարութիւնն է, որի միջոցով մենք Աստծուց թողութիւն ենք ստանում մեր գործած մեղքերի համար եւ արժանի ենք դառնում Արքայութեանը. «Ապաշխարեցէ՛ք, որովհետեւ Երկնքի արքայութիւնը մօտեցել է» (Մատթ. 3:2):

«Եթէ արհամարհում ես նրա բարութեան առատութիւնը եւ ներողամտութիւնն ու համբերութիւնը, չգիտե՞ս, որ Աստծոյ բարութիւնը քեզ ապաշխարութեան է տանում: Եւ քո խստասրտութեամբ ու անզիղջ սրտով քո անձի դէմ բարկութիւն ես դիզում բարկութեան օրուայ եւ Աստծոյ արդար դատաստանի յայտնութեան օրուայ համար» (Յռոմ. 2:4-6):

Աստուած Իր համբերատար ներողամտութեամբ եւ մարդասիրութեամբ մեղաւորներին հնարաւորութիւն է տալիս կատարեալ զոջումով, խոստովանութեամբ եւ ապաշխարութեամբ հրաժար-

ուել մեղքերից ու փրկուել, ինչպես որ գրուած էլ Է. «Բայց դու յիշի՛ր, որ իրար հետ դատ ենք ունենալու. նախ դու խոստովանի՛ր քո անօրէնութիւնները, որ արդարացուես» (Ես. 43:26):

Գործք առաքելոցում գրուած է, որ երբ սրբազան առաքեալները համարձակօրէն քարոզում էին իրենց հոգեփրկչական խօսքն ունկնդրելու համար ի մի հաւաքուած հրեայ ժողովրդին, այս հրեաները ազդուեցին սրբազան առաքեալների քարոզութիւնից եւ զղջացին իրենց սրտերում. «Այս լսելով՝ ներկաները զղջացին իրենց սրտերում եւ ասացին Պետրոսին եւ միւս առաքեալներին. «Ի՞նչ պիտի անենք, եղբայրներ՛ր»: Պետրոսը նրանց ասաց. «Ապաշխարեցէ՛ք, եւ ձեզանից իւրաքանչիւրը թող մկրտուի Տէր Յիսուս Քրիստոսի անունով՝ մեղքերի թողութեան համար» (Գործք 2:37-38):

Այս ապաշխարութիւնը նեղ ու անձկալի մի դուռ ունի, սակայն այն տանում է դէպի յաւիտենական կեանքի ժառանգութիւնը, այն դէպքում, երբ աշխարհասիրութեան ու մեղսասիրութեան դուռը լայն եւ ընդարձակ է, սակայն տանում է կորստեան՝ դէպի յաւիտենական դատապարտութիւնը, ինչպես որ վճռեց մեր Փրկիչ Աստուած՝ այս հրամանն արձակելով. «Մտէ՛ք նեղ դռնով. ինչքա՛ն լայն է դուռը եւ ընդարձակ՝ ճանապարհը, որ դէպի կորուստ է



տանում, եւ բազմաթիւ են նրանք, որ մտնում են դրանով: Ինչքան անձուկ է դուռը եւ նեղ՝ ճանապարհը, որ տանում է դէպի կեանք, եւ սակաւաթիւ են նրանք, որ գտնում են այն» (Մատթ. 7:13-14):

Այս խօսքը մեկնելով՝ Յովհաննէս Ծործորեցին ասում է. «Այստեղ ասում է «նեղ»՝ նեղութիւնների պատճառով, ըստ առաքեալի այն խօսքի, թէ. «Բազում նեղութիւններով մենք պետք է մտնենք այն հանգիստը» (Գործք 14:21), և թէ՛ «Այս առժամանակեայ նեղութիւնը մեծ փառք է առաջ բերում մեզ համար» (Բ Կոր. 4:17): Ուստի նայի՛ր ոչ թէ դռան նեղ լինելուն, այլ թէ ո՛ր է այն տանում, և ո՛չ թէ լայնութեանը, այլ թէ մինչեւ ուր է այն հասնում:

«Նեղ» է կոչւում այն, ինչն ամէն կողմից ճնշվում է՝ կամրջի նմանութեամբ, երբ մէկը ճանապարհով գնալիս վտանգի է ենթակայ եւ աջ ու ձախ չի խոտորւում: Իսկ «լայն» է կոչւում այն, որ մէկը ճանապարհից դուրս գալով՝ ընդարձակ տարածքում է շրջում՝ շեղուած լինելով ուղիղ փողոցից: Եւ արդարացիօրէն է «դուռ» ասում, որովհետեւ ասես դռնից՝ այս կեանքից դուրս ենք գալիս՝ թողնելով այս աշխարհի տան մեջ մթերուած մեծ ունեցուածքը, նաեւ վշտերն ու նեղութիւնները: Ոմանք աշխարհում սակաւ վշտեր կրելուց յետոյ այդ դռնից ելնելով Կեանքին են յանդիպում, իսկ ոմանք էլ ընդարձակ

կեանք վայելելուց յետո դռան մօտ կորստեան են արժանանում: Իմացի՛ր նաեւ այն, որ ընդարձակ դռնով շատերն են ընթանում, ինչպէս ասում է Տերը, խաբուած լինելով հաճոյքներից եւ ճանապարհի առաջնորդի պատճառով գահավիժելով այնտեղ, ուր բազմած է կորուստը՝ սատանան, ըստ այս խօսքի. «Կան ճանապարհներ, որոնք ուղիղ են թւում, բայց նրանց ելքը դէպի դժոխքի հատակն է նայում» (*Առակ. 16:25*): Իսկ նեղ դռնով քչերն են ընթանում մեղմագնայ ընթացքի դժուարութեան պատճառով, քանի որ խաչ ու չարչարանքներ են սպասում, նահատակութիւններ ու նեղութիւններ, սակայն այս ճանապարհի Առաջնորդը վերելում բազմած Տերն է՝ անմահ կեանքը Բաշխողը եւ Երկնքի արքայութիւնը Պարգեւողը» (*Յովհաննէս Ծործորեցի, «Մեկնութիւն Մատթ. 7:13-14»*):

Ապաշխարութեան զօրութեան մասին Շարակ-  
նոցում ասում է, որ Քրիստոսի սուրբ զինուորներն այդ զօրութեամբ լցուած՝ սիրալի քաջութեամբ երկրից դէպի երկինք բարձրացան, եւ իրենց այդ վերընթացով մեզ էլ սովորեցրին նոյնն անել, ասել է թէ՛ թէպէտ մեծ նեղութիւն կրելով, սակայն մտնել ապաշխարութեան վերոնշեալ դռնով եւ երկնային հանգստին արժանանալ (*Շարակնոց*):

Մարդասեր Աստուած բացարձակապէս չի կամենում, որ մեղաւորները, յամառաբար մեղքի մէջ մնալով, մահուան մատնուեն եւ յաւիտենական դատապարտութեան արժանանան: Այլ Աստուած կամենում է, որ ամենքը խոստովանութեամբ եւ ապաշխարութեամբ դարձի գան ու կատարելապէս թողութեան արժանանան, ինչի համար եւ Տէրը մարգարէների, առաքեալների ու սուրբ Եկեղեցու հոգեւոր հովիւների միջոցով ապաշխարութեան եւ մեղքերից հրաժարուելու հրաւեր է տալիս. «Լուսացուէ՛ք, մաքրուէ՛ք, Իմ աչքի առաջ ձեր չար արարքները թօթափէ՛ք ձեզնից, վե՛րջ տուէք ձեր չարագործութիւններին: Սովորէք բարի՛ք գործել, արդարութի՛ն փնտռէք, փրկէ՛ք զրկուածի՛ն, արդարադատ եղէք որբի հանդէպ, իրաւո՛ւնք տուէք այրուն: Եկէ՛ք խօսենք իրար հետ, - ասում է Տէրը - եթէ ձեր մեղքերը արեան պէս կարմիր են, ապա ես ձեան պէս ճերմակ կը դարձնեմ, եթէ որդան կարմիր լինեն, կը սպիտակեցնեմ ինչպէս բուրդ...Ե՛ս եմ, ե՛ս եմ այն նոյնը, որ ջնջում եմ իմ հանդէպ կատարած քո անօրէնութիւնները» (Ես. 1:16-18 հմմտ. Ես. 43:25):

Իսկ Երեմիա մարգարէն էլ ասում է. «Եւ այլեւ ամէն մէկն իր ընկերոջը չի սովորեցնելու, կամ ամէն մէկն իր եղբօրը չի ասելու, թէ՛ «ճանաչի՛ր Տիրոջը», քանզի ամենքը՝ նրանց փոքրերից մինչեւ մեծերը,

ճանաչելու են ինձ, – ասում է Տերը, – որովհետև  
Նրանց անիրաւութիւնները պիտի ներեմ եւ Նրանց  
մեղքերն այլեւս չպիտի յիշեմ» (Երեմ. 31:34):

Եզեկիելի մարգարեութեան մեջ էլ ասում է.  
«Դո՛ւ էլ, մարդո՛ւ որդի, ասա՛ Իսրայելի այդ տանը.  
«Այսպէս խօսեցէ՛ք ու ասացէ՛ք՝ մեր մոլորութիւն-  
ներն ու անօրէնութիւնները մեր մեջ են, եւ մենք  
դրանց մեջ մաշուում ենք, ինչպէ՛ս ազատուենք»:  
Ասա՛ Նրանց. «Ամենակալ Տէրն ասում է՝ կենդանի եմ  
ես եւ ամբարշտի մահը չեմ ուզում, այլ՝ Նրա յետ  
կանգնելն իր չար ճանապարհից ու ապրելը: Դար-  
ծէ՛ք, յե՛տ դարձէք ձեր չար ճանապարհից, ինչո՞ւ  
մեռնէք, ո՛վ տունդ Իսրայելի» (Եզեկ. 33:10-11):

Արդէն Նոր Կտակարանում Պետրոս առաքեալն  
ասում է. «Տերը չի ուշացնի Իր խոստումը, ինչպէս  
կարծում են ոմանք, թէ ուշացած է, այլ համբե-  
րատար է ձեր հանդէպ. քանզի չի ուզում, որ որեւէ  
մէկը կորստեան մատնուի, այլ ուզում է, որ ամենքը  
ապաշխարեն» (Բ Պետ. 3:9):

Եւ ահա Յովհաննէս առաքեալն ասում է. «Իսկ  
եթէ խոստովանենք մեր մեղքերը, հաւատարիմ է Նա  
եւ արդար՝ մեր մեղքերը մեզ ներելու եւ մաքրելու  
համար մեզ ամէն անիրաւութիւնից» (Ա Յովհ. 1:9):

Սուրբ Գրիգոր Նարեկացիին ապաշխարութեան  
մասին գրում է հետեւեալը.

Ինչպես որ առանց Քրիստոս Աստծոյ մեր  
հոգիներին փրկութիւն չկայ,  
Եւ ոչ էլ առանց աչքի տեսողութեան՝ լոյսի  
գուարճանք,  
Եւ կամ արեւի քաղցրութիւն՝ առանց  
արեւածագի,-  
Այսպէս էլ առանց ծածուկ մեղքերի  
խոստովանութեան  
Եւ ինքնապարսաւ մեղադրանքների՝ չկայ  
բաւութիւն:

*(Սբ. Գրիգոր Նարեկացի, «Մատեան ողբերգութեան», Բան Ծ)*

Համաբարբառ Աւետարանի իր մեկնութեան մէջ սուրբ Եփրեմ Ասորին ասում է. «Բոլոր մեղաւորներն էլ ապաշխարութեամբ թողութիւն են ստանում. համարձակութեամբ կարող եմ ասել, որ չկայ այնպիսի մի մեղք, որի համար եթէ մէկն ապաշխարի, թողութեան չի արժանանայ» *(Սբ. Եփրեմ Ասորի, «Մեկնութիւն Համաբարբառ Աւետարանի», 10-րդ գլուխ):*

Սուրբ Խոսրով Անձեւացին էլ ժամակարգութեան իր մեկնութեան մէջ գրում է. «Նոյնիսկ եթէ բիւրաւոր չարիքներով խոցոտենք մեր հոգին, պիտի հաւատանք, որ ապաշխարելու դէպքում Քրիստոսի

մարդասիրութեան կողմից կարող ենք քաւութեան եւ թողութեան արժանանալ» (Սբ. *Խոսրով Անձեւացի*, «Մեկնութիւն ժամակարգութեան»):

Յովհաննէս աւետարանչի Ընդհանրական առաջին Նամակի մեկնութեան մեջ, ի մասնաւորի մեկնելով Ա Յովհ. 1:8-րդ համարը («Եթէ ասենք՝ «Մենք ոչ մի մեղք չունենք», մենք մեզ ենք խաբում, եւ ճշմարտութիւն չկայ մեր մեջ»), սուրբ Սարգիս Շնորհալին ասում է. «Եթէ մենք չմոռանանք մեր մեղքերը, այլ մշտապէս մտապահենք դրանք, Աստուած կը մոռանայ, իսկ եթէ մենք մոռանանք, այդժամ Աստուած չի մոռանայ մեր գործած այդ մեղքերի մասին: Եւ սույն ոգով խոստովանութիւնից յետոյ անհրաժեշտ է ապաշխարութեան սպեղանին դնել վերքի վրայ ու հաստատակամօրէն ամէն ջանք գործադրել այդ մոլեգին ախտը եւ միւս բոլոր մեղքերը վերացնելու եւ յաղթութեան դրոշը ծածանելու համար:

Արդ, Աստուած մեզնից այսպիսի խոստովանութիւն ու այսպիսի ապաշխարութիւն է պահանջում: Եւ երբ մենք մեզնից հասանելիքը կատարում ենք, տե՛ս, թէ ինչ է լինում՝ ըստ Սուրբ Գրքի (Ա Յովհ. 1:9) խօսքի. «Հաւատարիմ է Նա եւ արդար՝ մեր մեղքերը մեզ ներելու համար»» (Սբ. *Սարգիս Շնորհալի*, «Մեկնութիւն Ա Յովհ. 1:8, Ճառ Բ»):

Ամփոփելով՝ մեջբերենք սուրբ Գրիգոր Լուսա-  
ւորչի խօսքերը, որոնք գրի են առնուած «Յաճախա-  
պատում» ժողովածուի մեջ. «Նեղութեան մեջ թէ  
անդորրի՝ պէտք է մտերմութիւն ցուցաբերենք մեր  
Տիրոջ հանդէպ, եւ Նա մեզ կը շնորհի Իր չնուազող  
պարգեւները: Քանի որ Աստուած կամենում է բոլորի  
ապրելը, որպէսզի ժառանգաւոր լինեն անանց  
փառքերին եւ այն մեծութեանը, որ մեր Տէր Քրիստոս  
Յիսուսի մօտ է:

Եւ մեզնից իւրաքանչիւրս, որ Նրա վաստակնե-  
րով ու առաքինութեամբ սրբուելով չար ցանկու-  
թիւններից՝ առիթ պէտք է հանդիսանանք շատերի  
փրկութեան համար, ճշմարտուած վարք ցուցա-  
բերելով երկրից կը փոխադրուենք երկնաւոր հան-  
գըստի քաղցրանուշ արքայութիւնը՝ միշտ Քրիս-  
տոսի հետ լինելու եւ Նրա երանելի բարիքները  
վայելելու համար:

Եւ ինչպէս որ մարդու հասակը կանգուն է մնում  
իր անդամներով, այդպէս էլ բարի գործերով կանգ-  
նեցւում եւ հաւատքով ամրանում է յոյսը, իսկ յոյսի  
միջոցով էլ՝ առաքինութեան գործերը:

Եւ այդպէս յորդորուելով Աստուածային սիրով՝  
մարդ ստանում է Սուրբ Հոգու շնորհները, եւ  
վերնայինների հետ անմահ երկնայինների կեանքին  
ժառանգակից դառնալով՝ կենդանարար սերը սուր-

բերի բնակարանում ծաղկում է գեղեցկագոյն փառ-  
քով եւ անճառելիների ու մշտնջենաւորների շար-  
քում միշտ փառաւորում է Ամենասուրբ Երրորդու-  
թեանը յաւիտեանս յաւիտենից. ամէն» («Յաճախա-  
պատում», ճառ 2):





## ՎԵՐՋԱԲԱՆ

Խորհրդաւոր «Դռների» մասին այս գրքոյկը շարադրուած է ըստ այն վարդապետութեան, որը մեզ համար ընկալելի ձեւով՝ մարգարեական, աւետարանական, առաքելական եւ հայրապետական պարզ խօսքերով յայտնուեց մեզ Սուրբ Հոգու շնորհների միջոցով:

Եւ արդարեւ, հոգեւոր հովիւների պարտաւորութիւնն է թէ՛ խօսքով եւ թէ՛ գրչով, թէ՛ առանձնաբար ու մանաւանդ եկեղեցու սուրբ ատեանում ժողովրդի մէջ քարոզել Կեանքի խօսքը՝ մարդկանց աստուածային բարեխնամ կամքը ճանաչեցնելու, նրանց աստուածահաճոյ առաքինի վարքով ապրելու, մոլութիւնների ու մոլորութիւնների արդիւնք եղող խորհուրդներից եւ գործերից ըստ ամենայնի հրաժարուելու պատգամը տալու նպատակով:

Աստուածային արդարութիւնը հենց այս պարտաւորութիւնն էր նախաձանուցում Եզեկիէլ մարգարեին, որը եւ գրում է. «Տէրը խօսեց ինձ հետ ու ասաց. «Մարդո՛ւ որդի, ես քեզ դէտ կարգեցի Իսրայելի այդ տանը. դու Ինձնից պատգամներ ես լսելու

Եւ Իմ անունից սպառնալու ես նրանց: Երբ անօրէնին ասեմ՝ ստոյգ պիտի մեռնես, դու այլեւս չես զգուշացնելու նրան, ոչ էլ ասելու ես անօրէնին, որ զգուշանայ, յետ դառնայ իր չար ճանապարհից ու ապրի: Այդ անօրէնն իր անօրէնութեան մէջ է մեռնելու, եւ նրա արիւնը քեզից եմ պահանջելու: Իսկ եթէ դու անօրէնին զգուշացնես, ու նա յետ չդառնայ իր անօրէնութիւնից եւ իր ճանապարհից, – այդ անօրէնն իր անօրէնութեան մէջ է մեռնելու, իսկ դու քեզ փրկելու ես: Եւ երբ արդարն էլ իր արդար գործերից շեղուի ու յանցանքներ գործի, նրա գլխին տանջանքներ եմ բերելու. ինքը մեռնելու է, որովհետեւ նրա կատարած արդար գործերը չեն յիշուելու: Բայց քանի որ դու նրան չես զգուշացրել, նրա արիւնը քեզից եմ պահանջելու: Ապա եթէ դու զգուշացնես արդարին, որ նա մեղք չգործի, արդարն ապրելով պիտի ապրի, որովհետեւ զգուշացրել ես նրան. դու էլ քեզ պիտի փրկես» (Եզեկ. 3:16-21):

Յիշե՛նք մեր կենսատու Յիսուս Քրիստոսի անէտարանական առակը՝ նմանուելով բարի ու հաւատարիմ ծառաներին, որոնք Աստուծոյ խօսքի քանքարը չանարգեցին, այլ հաւատարիմ եղան իրենց տիրոջը, ինչի շնորհիւ էլ գովասանքի ու վարձատրութեան արժանացան: Եւ երբեւէ չնմանուե՛նք այն չար ու վատ ծառային, որը չցանկացաւ իր ծառա-

յուրօրինակ հաւատարմութեամբ կատարել, այլ ծուլութեան պատճառով տարաւ-թաքցրեց իր քանքարները, ինչի հետեւանքով էլ տիրոջից արժանի պատիժ ստացաւ: Առակում պատմուում է. «Մի մարդ, հեռու երկիր գնալիս, կանչեց իր ծառաներին եւ իր ունեցուածքը նրանց տուեց. մէկին տուեց հինգ քանքար, միւսին՝ երկու եւ մի ուրիշին՝ մէկ. իւրաքանչիւրին ըստ իր կարողութեան. եւ գնաց: Ով հինգն առաւ, իսկոյն գնաց, դրանով գործ արեց եւ հինգ եւս շահեց: Նոյնպէս նա էլ, որ երկուսն առաւ, երկու եւս շահեց: Իսկ ով մէկն առաւ, գնաց հողը փորեց եւ իր տիրոջ դրամը թաքցրեց: Շատ ժամանակ անց, այն ծառաների տէրը եկաւ եւ նրանց հետ հաշիւ տեսաւ: Ով հինգ քանքար էր առել, մօտենալով՝ հինգ քանքար եւս տուեց ու ասաց. «Տէ՛ր, հինգ քանքար տուիր ինձ. արդ, ահաւասիկ վրան հինգ քանքար եւս շահեցի»: Իր տէրը նրան ասաց. «Ապրե՛ս, բարի՛ եւ հաւատարի՛մ ծառայ, որովհետեւ այդ քչի մէջ հաւատարիմ եղար, շատի վրայ կը կարգեմ քեզ. մտի՛ր քո տիրոջ ուրախութեան մէջ»: Ով երկու քանքարն էր առել, նա էլ մօտեցաւ ու ասաց. «Տէ՛ր, ինձ երկու քանքար տուիր, ահաւասիկ երկու այլ քանքար եւս, որ դրանց վրայ շահեցի»: Իր տէրը նրան ասաց. «Ապրե՛ս, բարի՛ եւ հաւատարի՛մ ծառայ, որովհետեւ այդ քչի մէջ հաւատարիմ եղար,

շատի վրայ կը կարգեմ քեզ. մտի՛ր քո տիրոջ ուրախութեան մէջ»: Մօտեցաւ նաեւ նա, որ մէկ քանքար էր առել, ու ասաց. «Տէ՛ր, գիտէի, որ դու մի խիստ մարդ ես, հնձում ես, ինչ որ չես սերմանել, եւ հաւաքում ես այնտեղից, ուր չես ցանել. վախեցայ. գնացի եւ թաքցրի քո այս քանքարը հողի մէջ: Արդ, ահա՛ւասիկ, քոնը՝ քեզ»: Տէրը պատասխան տուեց եւ ասաց նրան. «Չա՛ր եւ ծո՛յլ ծառայ, գիտէիր, որ հնձում եմ, ուր չեմ սերմանել, եւ հաւաքում այնտեղից, ուր չեմ ցանել. դու պետք է իմ այդ դրամը լումայափոխների մօտ դնէիր, եւ ես, գալով, տոկոսով միասին պահանջէի այն, ինչ որ իմն է: Արդ, դրանից առէ՛ք այդ քանքարը եւ տուէ՛ք նրան, ով տասը քանքար ունի. քանի որ՝ ով ունի, նրան պիտի տրուի եւ ունեցածը պիտի աւելացուի, իսկ ով չունի, նրանից ունեցածն էլ պիտի վերցուի: Իսկ այդ անպիտան ծառային հանեցէ՛ք դուրս, արտաքին խաւարը. Այնտեղ կը լինի լաց եւ ատամների կրճտում»» (Մատթ. 25:14-30):

Նոյն միտքն է արտայայտում նաեւ սրբազան Պետրոս առաքեալը. «Իւրաքանչիւր ոք ինչպիսի շնորհ որ ընդունել է, ուրիշի հանդէպ թող Նոյնը մատակարարի որպէս բարի տնտես Աստծոյ պէսպէս շնորհների: Եթէ մէկը խօսի, թող այդ լինի Աստծոյ պատգամների նման: Եթէ մէկը մատակա-

րարի, թող այդ լինի այն զօրութիւնից, որն Աստուած շնորհում է, որպէսզի ամէն ինչում Աստուած փառաւորուի Յիսուս Քրիստոսի միջոցով, որին փա՛ռք եւ զօրութի՛ւն յաւիտեանս յաւիտենից. ամէն» (Ա Պետ. 4:10-11):

Իսկ ահա սրբազան Պօղոս առաքեալի խօսքերի համաձայն՝ երբ քարոզում ենք Կեանքի խօսքը, մեր հոգեւոր սպասաւորութեան պարտաւորութիւնն ենք կատարում ու զերծ ենք մնում դատապարտութիւնից՝ յաւիտենական փառքի վարձատրութիւնն ընդունելով: Իսկ եթէ անհոգ ենք գտնուում, ծուլանում ենք ու մեր կամքին ենք ծառայում, այդժամ յաւիտենական դատապարտութեան սոսկալի «վա՛յ»-ին ենք արժանանում. «Եթէ աւետարանում եմ, այդ ինձ համար պարծանք չէ, քանզի պարտաւորութիւն է դրուած իմ վրայ: Բայց վա՛յ է ինձ, եթէ չաւետարանեմ: Եթէ կամովին եմ անում այդ, վարձ կայ ինձ համար, իսկ եթէ՝ ակամայ, ծանր պարտականութիւն է ինձ յանձնուած» (Ա Կորնթ. 9:16-17):

Դարձեալ, Պօղոս առաքեալն ասում է. «Այս քանն եմ վկայել տալիս Աստծոյ եւ Յիսուս Քրիստոսի առաջ, որ դատելու է կենդանիներին եւ մեռածներին՝ Իր յայտնութեան օրը, երբ գայ Իր արքայութեամբ: Եւ դու քարոզի՛ր Աստծոյ խօսքը, շարունակ՝ յայ-

տարարիր այն, ժամանակին լինի թե տարածամ, յանդիմանի՛ր, սաստի՛ր, յորդորի՛ր՝ կատարեալ համբերատարութեամբ ուսուցանելով... Արթո՛ւն եղիր ամեն ինչում, նեղութիւնների մեջ համբերի՛ր, անտարանջի գործե՛ր արա, լիովի կատարի՛ր քո պաշտօնը» (Բ Տիմ. 4:1-2, 5):

Արդ, ուշադրութեամբ ունկնդրե՛նք մեր երանելի սուրբ վարդապետ Յովհաննես Ծործորեցուն, որը մեր ուղղափառ սուրբ եկեղեցու հոգեւոր հովիւներին քաղցրաբարբառ խօսքերով խրատում է նմանուել մեր Նախահայրապետ եւ Լուսաւորիչ սուրբ Գրիգորին՝ գրելով այսպէս. «Քրիստոսի հօտին ու թանկագին գառներին դէպի երկինք ճանապարհին առաջնորդողնե՛ր եւ արածեցնողնե՛ր: Միակ Յօր Միածինն այդ գառներին գնել է Իր արեամբ ու մահով: Մեր Լուսաւորչի տասնհինգամեայ չարչարանքների շնորհիւ նրանք Աստոյ սեփական ժողովուրդ են դարձել եւ ձրիաբար ու առանց վարձի տրուել են ձեզ՝ որպէս ժառանգութիւն: Այդ գառներին մի՛ մոլորեցրէք լեռներում ու անմարդակոխ ճանապարհներում եւ նրանց մի՛ մատնէք գայլերի ու գազանների ձեռքը: Չէ՞ որ քաջ Յովիւն այդ գառներին Իր ուսերի վրայ դրած (Ղուկ. 15:5)՝ դէպի երկինք բարձրացրեց ու նրանց խառնեց ճշմարտագնացների թուփն:

Մի՛ նմանուէք վարձկաններին, որոնք միայն մարմնի համար են սերմանում, իսկ բանական գառների հոգիներն անտեսում են: Խոցուածների ու վիրաւորների հանդէպ անխնամառու, անգութ եւ անայցելու մի՛ եղէք (Ղուկ. 10:29-37), քանի որ յանուն Նրանց Քրիստոս յանձն առաւ խոցեր ու վերքեր ստանալ:

Եկեղեցու Նաւի նաւաստիներ, այդ սրբազան Նաւը կենսածուլի ծովի ալեկոծութեանն ու փոթորիկներին մի՛ մատնէք, որպէսզի չլինի թէ խորտակէք ու այդպիսով կորստեան դատապարտէք այն անմեղ մարդկանց, որոնց յանձն էիք առել դուրս բերել հեղձուցիչ ծովից: Դուք աստուածային այգու բանական եւ երկնաւոր տունկերի այգեպան ու պահապան եք կարգուել եւ ինքներդ էլ ճաշակում եք այդ այգու պտղից՝ ակն ունենալով ամենաբարի Տիրոջից երկնային վարձատրութիւն ստանալուն: Ուրեմն թոյլ մի՛ տուէք, որ գազաններն ապականեն աստուածային այգու պտղաբեր որթատունկի ճիւղերը, որոնք ճշմարտութեամբ են արմատաւորուած:

Աստծոյ պատուիրանների նկատմամբ զգուշաւորութեամբ անսասան պահէք այդ այգու պարիսպը: Ոտնակոխ մի՛ արէք հաւատքի աստուածահաստատ ուխտի պատուիրանները: Մի՛ խորտակէք

հայրենաւանդ ժառանգութեան ցանկապատը, որ պէսզի չխայթուէք չարաթոյն օձից՝ անբուժելի վերք ստանալով: Իմաստուն բժիշկներ եւ հոգիների վերակացունէ՛ր, դուք աստուածային բժշկարանն ունէք ձեր ձեռքում, ուստի անհնազանդ օձի կողմից խայթուածների ու բնական եւ անբնական ցաւերով պաշարուածների նկատմամբ անգութ ու անողորմ մի՛ եղէք: Տաւերը փարատելու փոխարէն չարիքները մի՛ «առողջացրէք» (Յօր 13:4):

Աստուածային առաքեալ Պօղոսը ձեզ եւ բոլոր հաւատացեալներին խրատ է կարդում ու ասում է. «Յիշեցէ՛ք ձեր առաջնորդներին, որոնք ձեզ Աստծոյ խօսքն ասացին: Նայելով նրանց կեանքի ընթացքի վախճանին՝ հետեւո՛ղ եղէք նրանց հաւատին» (Եբր. 13:7): Արդ, դուք նոյնպէս յիշէ՛ք ձեզ դէպի կեանք ու փրկութիւն առաջնորդողին եւ մտաբերէ՛ք ձեր աստուածագութ հօր, հոգիների լուսաւորչի ու Քրիստոսի ճգնաւոր նահատակ սուրբ Գրիգորի անտանելի չարչարանքները: Մի՛ մոռացէք, թէ նրա հողանիւթ մարմնի այդ սխրանքն ինչպիսի զարմանք էր պատճառել երկնային զօրքերին: Պատկանէ՛ք նրա այդ սոսկալի չարչարանքներից ու խստակրօն վարքից, չէ՞ որ այժմ դուք էլ նրա արեամբ, քրտինքով ու արտասուքով ցողուած հաւատի անդաստանի պտուղներն եք վայելում:



Արդ, նայե՛նք սուրբ Գրիգոր Լուսաւորչի ապրած կեանքին, թէ ինչպէս ապրեց այս աշխարհում կամ թէ ինչպիսին էր նրա կեանքի վախճանը, քանի որ այդ իսկ է ոչխարներին հովուութիւն անելու դուռը, որով սուրբ Գրիգորը ներս մտաւ՝ չարչարանքների միջով անցնելով: Նա հայ ժողովրդին «ծեռք բերեց» իր մարմնի ոսկորների քերուելու գնով: Սուրբ Գրիգոր Լուսաւորիչն իր կողերից հոսող արեամբ այս ժողովրդին Աստծոյ Եկեղեցի դարձրեց, ինչպէս որ մի ժամանակ նրա ՏԵՐՆ Էլ Իր կողակայլակ արեամբ համայն մարդկութիւնն ու աշխարհն էր Աստծոյ Եկեղեցու վերածել: Յանուն իր վայելչագեղ գառների՝ Յայոց հայրապետը խորովուեց կրակի վրայ, սարսափելի տանջանքների ենթարկուեց՝ կախաղանի վրայ բարձրացուած վիճակում անգամ աղօթելով իր հաւատացեալ հօտի համար:

Նա տասներեք տարի շարունակ խաւար գբում չարաթոյն օձերի մէջ էր բնակում, եւ դա անում էր մեր փոխարէն, որպէսզի մենք մեղքի գբի մէջ չմնայինք, օձի խայթոցների չենթարկուէինք եւ թունալի ախտերի մէջ չընկղմուէինք: Սա է հոգեւոր հովուութեան դուռը, եւ ով այս դռնով չի մտնում, նա գող է ու աւազակ (*Յովհ. 10:1*):


Ահա այդպէս է, որ ժառանգութիւնը սեփականում է, եւ ոչ թէ՛ արիւնակցական ազգակցութեան

միջոցով, քանի որ այստեղ խօսքը Քրիստոսի հօտին տեր կանգնելու մասին է: Քրիստոսի գառների գինը սա է, եւ ոչ թէ մեծաքանակ արծաթը, քանի որ մերժելի են բոլոր նրանք, ովքեր արծաթով են ընտրուել:


Արդ, հայեացք գցեք նրա՛ կեանքի վախճանին, ով ըստ այս օրինակի ներս մտաւ ոչխարների դռնով, նայե՛ք եւ զարմացե՛ք: Քանի որ նա իր ժողովրդին Աստծոյ ժողովուրդ դարձնելուց եւ քահանայապետական գահին բարձրանալուց յետոյ, աշխարհից հրաժարուելով, անապատային ու անմարդաբնակ վայրեր հեռացաւ, մերժեց պատիւը, փախաւ փառքից եւ դարձաւ Աստծոյ զրուցակիցը, հրեշտակներին երգակից դարձաւ ու սրբաբանօղ՝ սրբասաց սերովբէների հետ (*Յովհաննէս Ծործորեցի, «Մեր սուրբ հայր Գրիգոր Լուսաւորչի գովեստը»*):

## «Ոսկեդեմիկ» մատենաշարով տպագրուած գրքեր


### Ա. Յովիան Ոսկեբերան, Ապաշխարութեան պտուղներ (Քարոզներ եւ ճառեր), 2019




### Բ. Յակոբ Նալեան, Առաքիլի կեանքի ուղիս (Հոգեւոր գրոյցներ), 2020



## Գ. Յովնան Արք. Տերտերյան, Պատգամներ (Ասոյթներ եւ Թեւաւոր խօսքեր), 2020



## Դ. Կարապետ Արք. Պալատեցի, Տարեկան Բարոզգիրք (Ընտրանի), 2021




## Ե. Գարեգին Եպս. Խաչատուրեան, Յովիկի Խօսքեր, 2021

ԳՐԵՑԱԿՆԵՐ ԴԱՏԱՆԱԿԱՆ Ե

- Հասարակ քրոնիկ սիրոց եւ անձնոթիրոջնան մեջ է:
- Մ'կ կրնայ հնճարտաւնս փրկել ստուց սխոյ խաղը կրկու, որմաստով է հարկին իր անն ու ունեցածը:
- Նեղզամտօրփեւը կը դարձայ անօրջ իմն, որ ըստրօրինն ու հնճարտօրինը կը հարողոխն ու կը նախատօրին գիտանցորին:
- Սուր օտուր լոյս կը պահանջէ:  
Բայց որքան է խաւար ունի ինն «այս աշխարհից»:
- «Նուրցը միւտ վիճիւք է անդարար անկի վն» դիպի աղբիւրը անսպար Լոյսին:

ԳՐԵՑԱԿՆԵՐ ԴԱՏԱՆԱԿԱՆ Ե




**ԳՐԵՑԱԿՆԵՐ ԴԱՏԱՆԱԿԱՆ Ե  
ՀՈՎԻԿԻ ԽՕՍՔԵՐ**

## 2. Պաղտասար Դպիր, Գրքոյկ շահաւետ, 2022

«ՈՍԿԵՂՆԵՒԿ» ՄԱՏՆԵԱՆԱԿԱՆ Ե

- \* Ներկի ընկերացոյ: Ապա թե՛ ոչ՝ օրը են ջանքերը եւ զպը են աղօթքները:
- \* Հշմարիտ մարդու մէկ խօսքն առանկ զտառանիք է, քան ստափառ մարդու կրօնամեղքը:
- \* Անկի ճիշտ է միշտ պարզաստ եւ պահած ունեակ ստուր, քան թե՛ տպանի միջին, քնարտու զպար, պտիւր, որ ջլնի թէ՛ յանկարծ քշնամբն գաւ, եւ ի վիճակի շլնուն վաբով սաղը մնացը սանկու:
- \* Ղափաննի դեղը եղարարտօրփեւն է ծուրօրնան դեղը՝ աղբիւրիւնը, ազտօրնան դեղը՝ հիբրա-սիրտօրինը եւ ողբանուրփեւնը:
- \* Մտափունջ եղարարտու, զարթնէ՛ք սա մահարիտ թե՛ց, քանզի միտոց օրը գարտաղտիք վայա հասնելու:

ՊԱՂՏԱՍԱՐ ԴՊԻՐ



**ՊԱՂՏԱՍԱՐ ԴՊԻՐ  
ԳՐԸՈՅԿ ԾԱՆՈՒԹԵՏ**

# Է. Մատթեոս Ա. Կոստանդնուպոլսեցի, Աստուածային Շնորհների Դուռը, 2023


«ՄԱԿԵԴՆՅԱՆ» ՄԱՏԵՆՆԵՐ - Է



ԿՈՒՐԱՆ ԵՍՏՈՒՄԱՅԻՆ ՇՆՈՐՀԱՅ

*\* Սուրբ Հույու Բարեպարտիկան շարժմանը՝  
տիրի բազում հիանալի գործերը, որոնք  
գտնում են վերին կայաններում:*

*\* Կյոս սուրբաբարտիկանը նեղ ու անկողի  
մի գուռ անի, սակայն այն ստանում է զեփ  
յարկանական կեանքի ժառանգությունը,  
այն հեղափոխ, երբ աշխարհաբարտիկան  
ու մեղաբարտիկան գուռը բաց է:  
Շնորհակալ է, սակայն ստանում է կրթական  
զեփ յարկանական գաստաբարտիկանը:*

*Մատթեոս Ա. Կոստանդնուպոլսեցի*



ՄԱՏԵՆՈՒ Ա. ԿՈՍՏԱՆԴՆՈՒՊՈԼՍԵՑԻ  
**ԿՈՒՐԱՆ  
ԱՍՏՈՒԲՈՒՄԱՅԻՆ ՇՆՈՐՀԱՅ**

## ԲՈՎԱԼԴԱԿՈՒԹԻՒՆ

Մեղրածորան գիրքը. Յովնան Արք. Տերտերեան	3
Երկու խօսք	5
ԱՌԱՋԱԲԱՆ	11
ԳԼՈՒԻՆ Ա. ՔՐԻՍՏՈՍ՝ ԴՈՒՌԸ ԱՐՔԱՅՈՒԹԵԱՆ	15
ԳԼՈՒԻՆ Բ. ՀԱԲԱՏՔԻ ՄԱՍԻՆ	22
ԳԼՈՒԻՆ Գ. ՅՈՅՍԻ ՄԱՍԻՆ	32
ԳԼՈՒԻՆ Դ. ՍԻՐՈՅ ՄԱՍԻՆ	43
ԳԼՈՒԻՆ Ե. ՄԿՐՏՈՒԹԵԱՆ ՄԱՍԻՆ	53
ԳԼՈՒԻՆ Չ. ԱՊԱՇԽԱՐՈՒԹԵԱՆ ՄԱՍԻՆ	63
ՎԵՐՋԱԲԱՆ	73
«Ոսկեղենիկ» մատենաշարով տպագրուած գրքեր	83

ՄԱՏԹԵՆՍ Ա. ԿՈՍՏԱՆԴՆՈՒՊՈԼՍԵՑԻ

ԱՍՏՈՒԱԾԱՅԻՆ  
ՇՆՈՐՅՆԵՐԻ  
ԴՈՒՌԸ

Գրաբարից աշխարհաբար փոխադրութիւնը  
եւ ծանօթագրութիւնները՝  
Գեւորգ Սրկ. Կարապետեանի  
Խմբագիր՝ Նորայր Պօղոսեան



Տպագրութիւն ԱՄՆ Արեւմտեան թեմի  
Լոս Անջելէս 2023